

2

D. SALONII

VIENNÆ GALLIARVM

EPISCOPI DOCTISS. AD VERA

*nium Fratrem, Dialogi duo, in quorum pri
ore Parabolas Salomonis, in altero an
tem Ecclesiasten interpretatur.*


BESSARIONIS

PATRIARCHÆ CONSTANTINO

*politani, de ea parte Euangelij, Si cum uolo ma
nere &c. Erudita, & ualde
utilis disceptatio.*

D. IOHANNES ALEXANDER

*Brasiliensis, lreconfultus, pietatis ergo, in
lucem addit.*



Aganoe, ex officina ~~typographica~~

Anno M. D. XXXII.

Mense Februario.

THE SALON

STREET OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

RESTAURANTS

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

THE CITY OF THE CITY

REVEREND. AC

ERVITO PATRI, D. GVILIELMO

FIGVLO, COENOBII AD S. CRUCEM IN

Austria Seniori, Dn. & amico suo

charis. Iohan. Alexander Brassi

canus, Iureconsultus,

S. D. P.



ECTE AC PRVDENTER
mihi Plinius dixisse uide-
tur, plurimum referre, in
quæ tempora cuiusq; uir/
tus inciderit. Ita, ut com-
plures magni nominis scri-
ptores hoc unum sibi defu-
isse conquerantur, q̃ non
sub Alexandro Magno ui-
xissent. Vnde & Arcestratus, insignis alias poeta,
cum graui admodū paupertate premeretur, & per-
inde ab omnibus contemptibilis haberetur, fertur
ad eum quidam dixisse, ἀλλ' εἰ καὶ Ἀλέξανδρον ἴγῃς, κατὰ
σὶ χορὴν αἰροῖς κύπελλον Φοινίκην ἔσθαι. Id est, At si tu in Ale-
xandri tempora incidisses, in singulos ille uersus Cy-
prum aut Phœnicem tibi dedisset. Quemadmodū
enim fruges non tam ingenio soli, q̃ cœli beneficio,
melioREQ; temperiæ lætius exuberant, ita & melio-
res artes eximiaq; ingenia, benignitate, humanita-
teq; principum uirorum euocantur & excitantur.
Sic Archelaus Macedonum rex, Chœrilo poetæ de-

scribenti uictoriam Atheniensiu aduersus Xerfen,
 pro unoquoq; uersu aureum staterem numerari ius
 sit. Hieron Archimelo Epigrammatario poetæ pro
 pter unicum Epigramma in nauem suam scriptum,
 mille frumenti medimnos dono dedit, & suis stipen
 diis in Pyraeum usq; misit. Imperator Seuerus Op
 piano pro singulis uersibus singulos aureos dono
 dedit. Ita ut peteres ob eam rem aurea carmina Op
 pianidixerint. Antoninus Pius nō donis tantum
 & pecuniis literatos ornauit, sed prouinciis præfe
 cit, honoribusq; q̄maximis honestauit. Dionysius
 Syracusanus Heliconem Cyzicenum talento dona
 uit, quod Solis deliquium prædixisset. Lysander
 ob pauculos uersus Antilochi poetæ pileum argen
 to impleuit. Quos uiros cum apud me memoria re
 peto, uersibus iis alloqui consueui.

Fœlices animæ, quæ uos tam læta tulerunt

Secula, uel tales qui uos genuere parentes.

Necomnino contemnendum seculum fuisse depre
 hendimus, quo memorabiles illi scriptores, ac eru
 ditissimi Episcopi, Saluianus, Eucherius, Claudia
 nus, Salonius, Veranius, Vincentius, ac alii non
 multū iis absimiles uixerūt. Nostra certe ætas sic est
 inquinata flagitiis omnibus, sic pernitiōsis sectis est
 (ut ita dixerim) dissecta, ut cum nullo superiore,
 quantumuis corrupto, seculo conferri possit, a prin
 cipibus plane nihil est præsidii bonis studiis, adeo
 ut uere dixerit ille, habere eos τὴν ἄχρην ἐν ταῖς φάττοις

οὐδὲ τῶν μούσων, ἀλλ' ὅσων ἐπιταλόμενα ἀκούειν. Ex Epi-
 scopis quæ paucissimi studiorum causæ fauēt, nescio,
 quo fatali tandem malo fere summi cum infimis in
 literarum eadem conspirauerint. Corruunt Aca-
 demix fere omnes, frigent auditoria, iam non erudi-
 endis adolescentibus, sed alendis porcis instituta.
 Tum a studiorum cultu (quæ malum est hæc insa-
 nia) bona pars se Sellularibus artibus addicit. Sed
 quid facias, ubi res in manu tua non sit. Et recte Po-
 lynices apud Tragicum poetam admoneat, τὰς τῶν
 κρατούντων ἀμαθίας φέρειν χρεῖον. Ego interea ut me à con-
 spectu malorū, quæ nostra tot per annos uidit ætas,
 uel aliqua ex parte auertam, sic me secretorum studi-
 orum honestiss. uoluptati addixi, ut præterea susq;
 deq; faciam omnia, eius aut secessus non aspernan-
 dum fructum ad te muneri mitto, nimirum Salonii
 Viennæ Galliarum Episcopi in Prouerbia Salomo-
 nis, ac Ecclesiasten, breuē quidem illam, sed insigni-
 ter eruditam interpretationē, quam cum nuper ab
 interitu uindicasset, neminem certe habui, cui poti-
 us illam & ob egregiam eruditionē, & incredibilem
 tuum in me amorem, quæ tibi inscriberē. Habes itaq;
 à Brassicano tuo munus exiguum quidem, sed quod
 abūde magnū uideri queat, si sæpe lectum fuerit. Et
 memineris oportet, naturā nusq; magis esse totam
 & perfectam, quæ in minimis. Vale bene uir optime
 ac amicissime, Viennæ Austriæ ex Regio Collegio.
 Anno a nato Iesu M. D. XXXI. Mense Decembri.

D. SALONII EPI

SCOPI VIENNENSIS ERUDITISS. DIA

logus prior, ad Veranium fratrem, in
quo Parabolæ Salomonis non mi
nus pie, q̃ erudite explicantur.

Colloquuntur Veranius
& Salonius.



ERANIVS. PARABOLAE
qua lingua dicuntur? Sa
lonius. Græca, Latina ue
ro interpretatur Similitu
dines. Veranius. Quare
Salomon huic libro nomē
istud imposuit? Salon.

Vt per hoc demonstraret
quia nō iuxta literam, sed

aliter & spiritaliter intelligere debemus, quod dicit
Veran. Quid significabat Salomon, quod per pa
rabolas locutus est? Salo. Dominum Iesum Chri
stum, qui per parabolas locutus erat turbis Iudæo
rum. Nam & ipso nomine suo eundem Dominum
Iesum Christum significat. Ver. Quomodo ergo
interpretatur Salomon? Sal. Pacificus siue amabi
lis. Significat autem illum, de quo dicit Apostolus:
Christus pax nostra, qui fecit utraq; unum. Et item:
Pacificans per sanguinem suum, siue quæ in cœlis
sunt, siue

IN PARAB. SALOMONIS.

sunt, siue quæ in terris. Item quod Salomon amabilis interpretatur, aptissime illum significat, cui loquitur pater, dicens: Tu es filius meus dilectus, in quo mihi bene complacui. Ver. Quid significat ipso pacifico regni sui statu? Sal. Perennē Christi & Ecclesiæ regnum, de quo scriptū est: Et regni eius non erit finis. Ver. Quare iuxta Septuaginta Interpretum translationē hæc dicta Salomonis non parabolæ, sed prouerbia nominantur? Sal. Sicut parabolæ dicunt, quia occulta sunt, & secreta mysteria significāt, sic & prouerbia cōgrue uocant, quia talia sunt quæ sæpius in ore fideiū uersari, & memoriæ commendari ac retineri debeant. Ver. Quid utilitatis parabolæ Salomonis tribuunt? Sal. Sapientiam uidelicet & disciplinam, & hoc est quod ait: Ad discendam sapientiā & disciplinam. Ver. Quid distat inter sapientiam & disciplinam? Sal. Sapientia est diuinarum rerum cognitio. Disciplina uero, est sanctæ & puræ uitæ conuersatio. Ver. Quid est ergo discere sapientiam? Sal. Scire & intelligere, quomodo recte credere debeas. V. Quid est discere disciplinam? Sal. Cognoscere, qualiter unūquēq; oporteat uiuere, & quid operando conueniat agere, & quo debeat intentionem cordis dirigere. Sequitur, Timor Domini principiū sapientie. Ver. Quot sunt timores Domini? Sal. Duo, hoc est, seruilis & sanctus. Ver. Seruilis quare dici

IN PARAB. SALOMONIS.

tur? Sal. Quia ueluti serui Domino seruimus timore gehennæ, ne ad tormenta ducamur. Ver. Sanctus timor quare dicit? Sal. Quia sicut bonus filius timet, ne uel in modico offendat oculos amantissimi patris, sic & qui perfecti sunt in Ecclesia, timet, ne peccando offendat oculos Dei. Ver. Quis ex illis duobus sapientior? Sal. Seruilis, quia quicumque sapere incipit, hoc est, post peccata se cognoscit errasse, primo diuino timore corripitur, ne ad tormenta trahatur. Ver. Timor uero sanctus quid operatur? Sal. Auget sapientiam, quoniam perfecta charitas foras mittit timorē illum seruilem. Timor uero sanctus permanet in seculū seculi. Ver. Quid est quod Salomon dicit: Frustra iacitur rete ante oculos pennatorum? Nunquid nō solent aues sæpe retibus capi? Sal. Solent utique. Ver. Qui sunt ergo isti pennati? Sal. Sancti & electi uiri, qui habent pennas fidei, spei, & charitatis, cæterarumque uirtutum, quibus ad cœlestia cōtemplanda uolant, habent & spiritales oculos, quibus & insidias hostis antiqui præuident, & peccata præcauent. Frustra ergo, id est, in uanum iacitur rete ante oculos pennatorum, id est, Laqueus insidiarum Diaboli obicitur sanctis & electis uiris, quia facile in terra superare possunt insidias Diaboli, qui suam conuersationem habent in cœlis. Ver. Quæ est sapientia, de qua dicit Salomon: Sapientia foris prædicat, in plateis de
dituo

2 D. SALONII EXPLICATIO.

dit uocē suam? Sal. Christi Iesu, qui est Dei uirtus
& Dei sapientia, sicut dicit Apostolus. Ver. Hæc
ergo sapientia quomodo foris prædicat? Sal. Intus
prædicat, id est, in secreto, antequā pateretur, quia
paucis, id est, solis discipulis mysteria sui diuinitatis
ostendit: post resurrectionem uero suam prædica-
uit, quia misso de super spiritu sancto, aperte se per
Apostolos, q̄ Dei filius esset, mundo declarauit.
Ver. Quomodo in plateis dedit uocē suam? Sal.

Quia quæ ante in secreto & in occulto, & in uno
tantum Iudæorum populo docuerat, postea in lati-
tudine plebium, & coram omnibus gentibus mani-
feste prædicat per Apostolos, iuxta hoc quod eis præ-
cepit, dicens: Quæ dico uobis in tenebris, dicite in
lumine, hoc est, in manifesto: & quæ in aure audi-
tis, prædicate super tecta, id est, aperte & coram omni-
bus. Ver. Quid est quod ait, In capite turbarū cla-
mitat? Sa. Per caput designantur principes Iudæo-
rum. In capite turbarum clamitabat, quia principi-
bus Iudæorum homicidiū, quod in se patrauerant,
palam per Apostolos ad memoriā reducebat, &
eosdem ad poenitentiae remedium uocabat. Ver.

Quomodo intelligendum est quod sequitur, In for-
ribus portarum urbis profert uerba sua? Sal. Per
urbem sancta designat Ecclesia, cōgregata de utroq̄
populo, Iudæorum uidelicet & gentium. Fores por-
tarum huius urbis, sancti doctores fuerunt, qui uer-

bum Euangelii prædicando, credentes in eam intro-
 duxerunt. Sapientia ergo in foribus portarum urbis
 uerba sua proferebat, quando Christus in Apосто-
 lis suis loquebatur. V. Quid est quod ait, Inclina
 cor tuum ad intelligendā prudentiam? Quomodo
 potest homo inclinare cor? Sa. Ille inclinat cor suū
 ad cognoscendam prudentiam, qui humiliat se, &
 emundat animum suum a peccatis, ut dignus fiat ad
 percipienda mysteria Diuinitatis. Ver. Quid est
 quod dicit, Ne innitaris sapientiæ tuæ? Quis enim
 innititur sapientiæ suæ? Sal. Ille, qui sua sapientia,
 aut suis uiribus cōfidit se posse implere Diuina man-
 data. V. Ecce iterum dicit, Ne sis sapiens apud te
 metipsum. Quis enim est sapiēs apud semetipsum?
 S. Ille certe, qui se præ cæteris quasi doctor extollit
 & iactat de his, quæ ex dictis patrum recte cognosce-
 re ac intelligere potuit. V. Quæ est sapientia uera
 hominis? S. Timere Dominum, & recedere a ma-
 lo, & hoc est quod mox sequitur, Time Dominum
 & recede a malo. V. Vnde scis, q̄ hæc sit uera sapi-
 entia hominis? S. Quia in libro Hiob scriptū est:
 Ecce timor Domini, ipse est sapientia. Et recedere a
 malo, intelligentia. Ver. Quis ille homo, de quo
 Salomon dicit, Beatus homo, qui inuenit sapientiā?
 Sal. Christianus fidelis & catholicus. Ver. Quan-
 do iste inuenit sapientiam? Sal. Cum doctrina ue-
 ritatis, id est, Euangelii corporis simul & cordis per-
 cipit

D. SALONII EXPLICATIO.

cipit, & in Scripturis sanctis Domini uoluntatem
 studet cognoscere. Ver. Quando affluit pruden-
 tia? Sal. Quando cum magno amore, & sui condi-
 toris dilectione audit præcepta diuina, & opere stu-
 det implere. Ver. Quid est quod ait, Viæ eius pul-
 chræ, & omnes semitæ eius pacificæ? Quæ sunt istæ
 uiæ sapientiæ? aut quæ sunt semitæ eius? Sal. Viæ
 sapiëntiæ sunt actiones Domini, quas gessit in carnie:
 siue doctrinæ ipsius, quæ cōtinentur in libris Euan-
 gelii, quæ uiæ pulchræ sunt, quia diuinæ. Semita sa-
 pientiæ, sunt præcepta & mandata Domini, quæ
 ad pacem æternam, pacificæ, quia omnia præcepta
 Domini ad pacem æternam perducunt. Ver. De
 qua lege, aut de quo cōsilio dicit Salomon, cum ait:
 Custodi legem atq; consilium? Sal. De lege uideli-
 cet ac consilio sapientiæ Domini Iesu Christi. Ver.
 Quæ est lex sapientiæ? Sal. Lex sapientiæ est, quæ
 dicit: Si uis ingredi ad uitam, serua mandata, id est,
 non occides, non moechaberis, non furtū facies &c.
 Ver. Quod est consilium sapientiæ? Sal. Si uis
 perfectus esse, uende omnia quæ habes, & da paupe-
 ribus &c. Ver. Quid est quod ait, Abominatio
 Domini est omnis illusor? Quis est illusor? Sal. Il-
 lusor est, qui uerba Dei peruerse intelligendo & do-
 cendo corrumpit. Illusor est, qui suos proximos sim-
 plices & pauperes insultando contemnit. Illusor est,
 qui magna Dei promissa quasi parua despicit, & pœ

nam æternæ damnationis quasi tolerabilem spernit
 Omnes hos tales abominatur Dominus, & cum sim-
 plicibus est sermocinatio eius, quia illos gratia coele-
 stis sapientiæ illuminat, quia nihil in se duplicitatis
 habent. Ver. Quare Salomon dicit: Et ego filius
 fui patris mei tenellus, & unigenitus coram matre
 mea. Quomodo unigenitus fuit coram matre sua;
 cum præcesserit eum frater uterinus, sicut Scriptura
 sancta, libri Regū, testatur. Sal. Verum est, quia
 præcessit eum frater uterinus, sed ille mox mortuus
 est, quasi nunquam fuisset, sine nomine ab hac uita
 discessit, propterea se unigenitum appellat. Ver.
 Quare dicit, Ne declines ad dexteram neq; ad sinis-
 tram. Quis enim se ita continere poterit, ut corpus
 suum in dextram partem aut in sinistram non decli-
 net. Sal. Nemo, sed per dextram designatur uia
 bona, per sinistram uia mala & reprobā. Non pro-
 hibet ambulare in dextra uia, sed declinare ad dexte-
 ram. Ver. Quis ergo declinat ad dexteram, uel ad
 sinistram. Sal. Iustus declinat ad dexteram, qui de
 sua iustitia & suis uiribus præsumit. Iniustus de-
 clinat ad sinistram, qui propter carnis fragilitatem
 saluari se posse desperat. Declinat ad dexteram, qui
 uult plus sapere, q̄ oportet sapere. Declinat ad sinis-
 tram, qui seruit stultitię. Ver. Cur ergo dicit pau-
 lo inferius: Vias quæ a dextris sunt, nouit Domi-
 nus. Sal. Per uias quæ a dextris sunt, designantur
 sanctæ

sanctæ actiones & opera bona. Hæc enim nouit Dominus, id est, dirigit, & placent illi, unde & contra in iudicio dicturus est reprobis, Non noui uos, hoc est, non uos elegi, non enim mihi placetis, quia non uos uideo in luce mea, non uos uideo in iustitia mea. Ver. Quid est quod dicit, Ne des alienis honorem tuum, & annos tuos crudeli. De quo honore dicitur aut quos uocat alienos? Sal. De honore dicit, quo factus est homo ad imaginem Dei. Alienos dæmones appellat, & est sensus: Ne honorẽ tuum, quo ad imaginẽ Dei creatus es, male uiuendo subdas immundis spiritibus. Ver. Quem appellat crudelem? aut de quibus annis dicit? Sal. Annos uocat spacia uitæ. Crudelem, diabolum, & est sensus, Spacia uitæ, quæ tibi dedit Deus, male uiuendo ne tradas Diabolo. Ver. De qua cisterna docet Salomon bibere aquam? aut de quo puteo fluent? cum dicit, Bibe aquã de cisterna tua, & fluenta putei tui: Sal. Cisternam uocat catholicam, id est, ueteris & noui testamenti doctrinam: puteum uero profunditatem & altitudinẽ eiusdem catholicæ doctrinæ: aquam, scientiam: fluenta, copiam & abundantiam scientiæ, id est, uarios sacræ scripturæ appellat intellectus. Docet enim his uerbis, cauere a doctrina hæreticorum, & attendere lectionibus sacrarum scripturarum, & est sensus, Bibe aquam de cisterna tua, id est, serua, & opere imple doctrinam, quam aliis præ-

cas. Et fluente putei tui, id est, abundantia sermonis tui seu scientiæ affluenter in te redundet in operibus bonis. V. Quare dicit Salomon, Deriuuntur fontes tui foras, & in plateis aquas tuas diuide, cum sitim subiungat, Habeto eas solus, ne sint alieni participes tui? Si fontes nostros foras deriuamus, & in plateis aquas diuidimus, quomodo soli eam habere possumus? Sal. Quamuis in uerbis sonare uideatur, tamen nulla est contrarietas, quia hæ sententiæ non possunt nisi spiritaliter intelligi. Fontes ergo nostros foras deriuamus, cum aliis uim prædicationis infundimus, cum uerba sacre scripturæ aliis annunciamus. In plateis aquas diuidimus, cum populis prædicamus. Platea namque dicta est a latitudine: est enim Græcus sermo. In plateis ergo aquas diuidimus, quando in multitudine auditorum uerba scientiæ dilatamus, & iuxta uniuscuiusque qualitatem diuina eloquia dispensamus. Ver. Si aquas in plateis diuidere debemus, quomodo ergo eas soli habere possumus? Sal. Aquas in plateis diuidimus, quando aliis uerba diuina late prædicamus, & tamen soli aquas habemus, quia de ipsa prædicatione humanas laudes non quærimus. Ver. Quid est quod dicit, Ne sint alieni principes tui? Sal. Alienos uocat dæmones, de quibus dixit Psalmista: Alieni insurrexerunt super me, & fortes quasi animam meam &c. Tunc enim malignos, id est, immundos spiritus in prædica

D. SALONII EXPLICATIO.

p̄dicatione participes et socios nobis facimus. Quando per superbiam intumescimus, & de prædicatione nostra inanem gloriã desyderamus. Ver. De quo homine dicit Salomon, Non apostata uir inutilis graditur ore peruerso? Sal. Apostatam hominem appellat schismaticũ, qui laborat scindere unitatem Ecclesiæ. Ver. Qua lingua dicitur apostata? Sal. Græca, quod interpretatur in Latino sermone, refuga & recedens a ueritate. Quare ergo schismaticus dicitur apostata? Sal. Quia more superbientis angeli intus prius intumescit, & cadit a mentis suæ statu, quia sic ab amore sui conditoris & a ueritate recedit. Nisi enim prius a ueritate recederet in Ecclesia, in iustitiam non disseminaret. Ver. Cur ergo de illo dicitur, Annuit oculis, terit pede, digito loquitur? Sal. Interior mentis custodia, quæ membra exterius seruat ordinata, hic ergo apostata, quia statum & custodiam perdidit, idcirco dominica membra exteriora habet ex more, tulit inordinata. Ver. Quid est quod de lege sua dicit, Liga eam in digitis tuis, scribe eam in tabulis cordis tui? Quis enim legem in digitis ligare potest? aut si fecerit, quæ utilitas erit? Sal. In digitis dicit, id est, in actibus. Legem in digitis ligare est, quicumque in bonis operibus eam studet implere & exornare. In tabulis cordis dicit, id est, in latitudine cogitationis. Scribit ergo legem in tabulis cordis sui, qui eam cum gaudio suscipit, & memoriæ

IN PARAB. SALOMONIS

commendat. Ver. Quid est quod sapientia dicit,
 Per me reges regnant, & cōditores legis iusta decer-
 nunt. Per me principes imperant, & potentes decer-
 nunt iustitiam? Quæ est hæc sapientia, per quam re-
 ges regnant, principes imperant, conditores legum
 & potentes decernunt iustitiam? Sal. Christus Dei
 uirtus & Dei sapientia. Ver. Nunquid Christus
 omnibus tyrannis impiis & principibus dat regnū
 & imperium? Sal. Non utiq; , ueruntamen ipso
 permittente, impii reges & principes suscipiunt re-
 gnum uel imperia, quia scriptum est in libro Hiob:
 Permittit regnare hypocritam propter peccata po-
 puli. Sed in hoc loco reges, sanctos dicit Apostolos
 qui primum semetipsos, deinde Ecclesiam sibi com-
 missam, fideliter regere nouerunt. Siue reges appel-
 lat omnes sanctos, qui seipsos & alios bene regere
 sciunt. Ver. Quos appellat conditores legū? Sal.
 Vtriusq; testamenti scriptores. Ver. Quos uocat
 principes & potentes? Sal. Cæteros doctores &
 rectores fidelium. Omnes enim isti per sapientiam
 Dei patris habuerunt regnum, principatum & im-
 perium, id est, per Christum acceperunt, ut aliquid
 boni essent, unde ipse dicit: Sine me nihil potestis
 facere. Ver. Quid est quod sapiētia dicit, Delecta-
 bar per singulos dies ludens coram eo, id est, coram
 patre omni tempore ludens in orbe terrarum. Nun-
 quid sapientia, id est, Dei filius pueriliter ludebat
 coram

D. SALONII EXPLICATIO:

coram patre? Sal. Absit. Sed quod dicit ludens, intelligendum est, gaudens. Ludebat enim per singulos dies, id est, gaudebat se esse unum, id est, unius substantiæ cum patre a principio ex diebus æternitatis. Ver. Quomodo ludebat omni tempore in orbem terrarum? Sal. Quia cum tempora, orbis & creaturæ esse cœpissent, ipse filius gaudebat, quia ipse quod erat, semper in patre manebat. Ver. Quid est quod ait, Sapientia ædificauit sibi domum? Quæ domum ædificauit sibi sapientia? Sal. Sapientia, id est, Dei filius ædificauit sibi domum, quia ipse creauit hominē in utero uirginis, quem in unitate suæ personæ assumpsit. Ver. Quomodo excidit columnas septem? Sal. Septem columnas excidit, quia per septiformem gratiam spiritus sancti erexit Ecclesias per orbem terrarum, quæ sicut columnæ sustentando continent memoriam eius, id est, mysterium incarnationis ipsius. Ver. Potest aliter intelligi? Sal. Vere potest. Sapientiæ domus Ecclesia Christi est. Columnæ autem domus huius, sancti doctores, quæ columnæ bene esse septem dicuntur. Quia sancti doctores repleti sunt septiformi gratia sancti spiritus. Ver. Quomodo ergo excidit sapientia has columnas? Sal. Excidit columnas, quia mentes prædicatorum ab amore præsentis seculi separauit, & erexit eos ad portandā eiusdē Ecclesiæ fabricā. Ver. De quibus ancillis dicit paulo inferius, Misit ancil-

IN PARAB. SALOMONIS

las suas, ut uocarent ad arcem & ad moenia ciuitatis.
 Sal. Ancillas uocat sanctos apostolos. Ver. Qua
 re uocat eos ancillas? Sal. Propter insipientiam, in
 firmitatem & paupertatem, qua idiotas, infirmos,
 pauperes & despectos elegit apostolos, quos ad pre
 dicandum misit in mundum, ut fideles populos uo
 carent ad arcem æternæ beatitudinis, & ad moenia
 coelestis Hierusalem. Ver. Quis est filius sapiens,
 qui lætificat patrem, aut quis est filius stultus, qui
 moestitia est matri suæ? Sal. Ille, qui accepta fidei
 ac baptismatis mysteria bene seruat, et opere implet,
 filius sapiens est, ille proculdubio lætificat Deum pa
 trē. Qui uero accepta fidei ac baptismatis sacramen
 ta malis operibus, uel heretica prauitate corrumpit,
 filius stultus est, hic nimirū est moestitia matri suæ,
 uidelicet Ecclesiæ, quia contristat eam. Ver. Quid
 est quod ait, Stultus labiis uerberabitur? Quomo
 do potest homo stultus labiis uerberari? Sal. Ver
 beratio in hoc loco damnationem significat, Stultus
 ergo labiis uerberabitur, quia propter uerba iniqua
 & mala, quæ locutus est, condemnabitur. Vnde &
 alibi dicit Moyses: Et uita in manibus linguae, quo
 niam unusquisque aut ex uerbis suis condemnabitur,
 aut ex uerbis suis iustificabitur. Ver. Cur dicitur
 habere manus lingua, cum manus habere nō possit?
 Sal. Metaphorice dictum est, id est, per translatio
 nem, quemadmodū uenti dicuntur habere pennas.

Manus

D. SALONII EXPLICATIO.

Manus enim linguæ ipsa uerba sunt, quibus aut bene loquendo meretur uitam, aut mala loquendo meretur inortem, aliter per manus sæpe in scripturis saceris opera designantur, ut illud, Labores manuum tuarum quia manducabis. In manibus linguæ dicit, id est, in operibus. Opera etenim linguæ sunt colloquia bona uel inala, ex quibus mors nascit aut uita. Ver. Quis ille piger, de quo dicitur, Sicut acetum dentibus, & fumus oculis, sic piger his, qui miserunt eum? Sal. Piger est male uiuens catholicus, qui non laborat nec operatur, ut ad æternam beatitudinem peruenire mereatur. Per acetum & fumum hæreticorum designatur perfidia. Per oculos & dentes, prædicatores sanctæ Ecclesiæ, qui bene oculi dicuntur, quia recta itinera præuident. Pulchre etiam dentes, quoniam spiritualia, alimenta fidelibus ministrare solent. Ergo sicut acetum dentibus, & fumus oculis, id est, sicut perfidia hæreticorum est contraria bonis doctoribus, quia contristat eos, & molestiam illis gignit & lachrymas, sic piger, id est, catholicus malus, grauis est eisdem bonis doctoribus, qui miserunt eum, hoc est, qui iusserunt, ut fidem suam operibus imple-ret. Ideo grauis est, qui fidem suam prauis operibus destruit. Ver. Quid est quod ait, Manus in manu non erit innocens malus? Quomodo malus homo manus est in manu, & ideo non erit innocens? Sal. Qui manum iungit ad manum, nihil utique operatur,

IN PARAB. SALOMONIS

malus ergo q̄ diu fuerit manus in manu, non erit innocentens, quia et si ad tempus subtrahit manus ab opere malo, tamen q̄ diu malus est, innocentiam cordis habere non potest, unde superius dicit: Abominabile est Domino cor prauum. Ver. Quid est ergo manus in manu? Sal. Conscientia praua in opere malo. Ver. Quomodo intelligendum est quod ait, Circulus aureus in naribus eius, mulier pulchra & fatua? Sal. Hoc modo circulum aureum infixit in naribus suis, id est, in naribus porci, ille dum pergit terram uertere ac fodere naso, immergit circulum aureum in uolutabrum luti, & tunc perdit circulus aureus decorem quem habuit. Similiter ergo mulier fatua, si habet pulchritudinem uultus, uel si accipiat ornamenta in aurium monilium, simul & uestimentorum, sordidat pulchritudinem suam, & amittit decorem, si se coeno libidinis coinquinare diligit, & adulteriis corrumpit. Ver. Spiritualiter autem quomodo intelligenda est hæc sententia? Sal. Quicumque sacras scripturas intente meditatur, & iugiter perscrutatur diuina eloquia, accipit ornamenta scientiæ. Quod si male uiuendo corrumpit & destruit, quod bene intelligit, circulum aureum habet in naribus, sed more suis, uidelicet porci terram fodit, coinquinat & luto immergit, quia ornamentum quod per notidam scripturarum immunda actione sordidauit, talis anima mulier pulchra & fatua: pulchra,

quæ

D. SALONII EXPLICATIO.

quæ per scientiam, sed dedita carnalibus delectationibus, fatua est per actionem. Ver. Quid est quod dicit, Anima quæ benedicit, impinguabitur, & qui inebriat, ipse quoque inebriabitur? Plures nanque sunt, qui alios inebriant, sed ipsi non inebriantur? Non dicit hoc de corporali ebrietate, sed de spirituali anima, quæ benedicit impinguabitur, quia quæcunque exterius prædicando benedicit, spiritualem benedictionem accipit, id est, gratia spirituali augeatur & crescit. Similiter qui sacro eloquio mentes auditorum studet inebriare, inebriatur & ipse, sancti spiritus infusione repletur. Ver. Quare non dixit homo, sed anima quæ benedicit impinguabitur? Sal. In scripturis diuinis sæpius poni solet pars pro toto, aut totum pro parte, secundum speciem Grammaticæ artis, quæ dicitur Synecdoche, sic ergo in hoc loco pars posita est pro toto homine. Totum uero ponitur pro parte, ut illud, Tulerunt Dominum de monumento, Dominum dicit pro corpore Domini. Ver. Quis est ille, de quo dicit, Qui abscondit frumenta, maledicetur in populis? Nunquid propter ea maledicendus est aliquis, quia non omnibus frumenta sua ministrat? Sal. Frumenta, uerba sunt sanctæ prædicationis, ergo quicumque abscondit hæc frumenta, id est, uerba sanctæ prædicationis apud se retinet, & non uult annunciare aliis eloquia, iste maledicetur in populis, quia pro culpa silentii condem-

IN PARAB. SALOMONIS

habetur, quoniam multis prodesse poruit, sed quia noluit, ideo pro multorum poena iuste punietur.

Ver. Qui sunt illi qui uendunt frumenta, de quibus mox sequitur, Benedictio autem super capita uendentium? Sal. Illi uendunt frumenta, qui uerba uitae & sanctae praedicationis suis auditoribus annuntiant.

Ver. Quod precium accipiunt ab eis? Sal. Precium fidei, & confessionis sanctae. Ver. Quomodo ueniet benedictio super eorum capita? Sal. Quia si-

gulus eorum dicturus est dominus: Euge serue bone & fidelis, quia &c. Ver. Quid est quod ait, Qui

conturbat domum suam, possidebit uentos? Quomodo potest aliquis possidere uentos? Sal. Do-

mum in hoc loco mentem appellat, in qua unusquisque ueluti in domo habitat per cogitationes. Ventos,

immundos spiritus appellat. Qui ergo domum, id est, mentem suam malis & noxiis cogitationibus per-

turbare non timet, iste nimirum possidebit uentos, quia per malas cogitationes uiam fecit daemonibus,

ut ingrediantur & habitent in ipso. Possidebit uentos, id est, demones ad condemnationem sui. Ver.

Quomodo mulier diligens corona est uiro suo, & putredo in ossibus eius, quae confusione res dignas gerit? Sal. Mulier bona & casta honorem uiro suo

praebet in omnibus, & quia diligit eum, & beneregit domum ipsius. Corona illi est, quia eius uirtuti-

bus addit gratiam, unde coronatur a Domino, Adultera uero

uero

D. SALONII EXPLICATIO.

uero mulier, quæ foris uideatur speciosa, putredo tamen est in ossibus, quia intus fetore luxuriæ suæ membra coinquinat. Ver. Quomodo intelligendum est quod ait, Melior pauper est & sufficiens sibi, quam gloriosus et indignus panis? Sal. Vere melior est frater idiota et simplex, qui operatur bona quæ nouit, unde uitam æternam mereatur habere in cœlis. Quam gloriosus, id est, clarus doctrina & eruditione scripturæ, uel comptus doctoris officio, qui indiget pane dilectionis, quia neque Dominum diligit, neque proximum. Vel certe ideo panem indiget, quia non operatur quæ intelligit, aut docet. Ver. Quis est homo uersutus, qui cælat scientiam? Sic enim dicit: Homo uersutus cælat scientiam Sal. Versutus hoc loco in bona significatione ponitur, id est sapiens & prudens. Vir ergo uersutus, id est, sapiens & prudens aliquando de industria cælat scientiam, duabus uidelicet de causis: una, quia infirmis auditoribus non potest loqui quasi spiritualibus, sed quasi carnalibus, id est, magna sacramentorum scripturarum mysteria, quæ nouit, non audet illis manifestare, ne forte scandalizent: altera, quia non uult sanctum dare canibus, neque mittere margaritas ante porcos. Ver. Quid est quod ait, Vult & non uult piger? Si uult, quomodo ergo non uult? Sal. Per pigrum ille designatur, qui se non uult exercere in bonis opibus: Vult ergo regnare piger cum Deo, & non uult laborare pro Deo. Vult peruenire ad beatitudinem, & tamen non uult precepta Christi im-

plere, ut beatitudinem mereatur obtinere. De hoc enim Iacobus dicit: Vir duplex animo inconstans est in omnibus viis suis. Ver. De quibus operibus dicit, Anima autem operantiū impinguabitur? Sal. De illis dicit, qui bona operantur, qui Domini student implere praecepta, illorū anima impinguabitur gratia spiritali, & dulcedine regni coelestis. Quare impinguabitur anima illorū, qui bona operantur? Quia post labores uitæ presentis inmarcescibili mercede remunerabitur. Ver. Quis est nunci us impii, de quo dicit, Nuncius impii cadit in malū? Sal. Nuncius impii, id est, angelus diaboli, Arrius fuit & Sabellius, cæteriꝫ hæretici angeli Sathanæ, isti nimirum ceciderunt in malum, id est, æternæ gehennæ tormentum. Ver. Quis est legatus fidelis, de quo sequitur, Legatus fidelis, sanitas? Sal. Legatus fidelis est unusquisq; catholicus prædicator et doctor, qui sibi, suisq; auditoribus sanitatem & salutem acquirit æternam. Ver. Quare dicit, Iacebunt mali ante bonos, & impii ante portas iustorū, cum in hac uita magis boni soleant iacere ante malos, & iusti ante portas iniquorum? Sal. In nouissimo iudicio coronatis iustis, impii condemnabuntur, qui eos in præsentī uita affligebant, & idcirco dicit, Iacebunt mali ante bonos, & impii ante portas iustorū. Attamen quod dicit, ante bonos, & ante portas iustorum, non ad uicinītatē loci pertinet, quoniam mali

D. SALONII EXPLICATIO.

malī & boni non sibi erunt tunc uicini, sed pertinet ad uisionem bonorum, quoniam boni semper uidebunt tormenta malorum. Vnde Deo liberatori suo maiores sine fine referant gratias. Ver. Quid est quod ait, Pondus & statera iuditia sunt Domini, & opera eius omnes lapides seculi? Quomodo pondus & statera iuditia sunt Domini? Sal. Quia Dominus omnia in pondere, & mensura, & numero constituit. Pondus & statera iuditia Domini sunt, quia sicut ipse uoluit, unicuique mensuram fidei, & gratiam spiritus sancti distribuit. Ver. Quos appellat lapides seculi? Sal. Iustos et fortes in fide omnes lapides seculi, id est, sancti et electi uiri opera sunt Domini, quia nemo sua uirtute, nemo suo merito electus est a Domino, ut celesti ædificationi esset aptus, sed sola gratia & misericordia ipsius. Ver. Quid est quod dicit, Corona senum, filii filiorum: & gloria filiorum, patres eorum. Si mali sunt filii filiorum, quomodo gloria sunt senum? id est, patrum suorum: aut si patres mali sunt aut fuerunt, quomodo sunt gloria filiorum? Sal. Senes in hoc loco Patriarchas uocat et Prophetas, quorum filii sunt sancti Apostoli, & filii filiorum, successores Apostolorum, uidelicet sancti prædicatores. Omnes enim isti corona senum sunt, id est, Patriarcharum & Prophetarum, quia digna laude celebrant eos, per quorum exempla & uaticinia ad cognitionem gratiæ peruenerunt.

Ver. Quomodo patres gloria sunt filiorum? Sal. Magna quippe est gloria prædicatoribus noui testamenti, quia filii ueterum patrum, id est, Patriarcharum & Prophetarum esse meruerunt. Ver. Quare dicit, Qui dimittit aquam, caput est iurgiorum? Nunquid ille qui clausam aquam decurrere dimittit, iurgia concitat? aut nunquid non magis uinum quam aqua iurgia concitare solet? Sal. Figurate hoc dictum est. Nam per aquam designatur lingua leuis, fluxa, & qui immodice linguam suam relaxat, caput est iurgiorum, quia qui linguam suam non refrenat, iurgia & lites concitat, & concordiam dissipat. Ver. Dic mihi, quæso, quomodo in facie prudentis lucet sapientia, sicut ait Salomon: Oculi autem stultorum sunt in finibus terræ. Sal. Prudens homo sæpe in ipsa uultus claritate & faciei suæ solet præmonstrare grauitatem sui sensus, & claritatem intellectus. Stulti uero ad hanc imitandam & sectandam, uidelicet grauitatem, oculos mentis non possunt attollere, sed tota admiratione perquirunt, qualiter ad finem, hoc est, ad impletionem carnalium uoluptatum pertingere ualeant. Ver. Nunquid ita solummodo intelligere debemus? Sal. Neque specialiter hoc de Christo debemus intelligere dictum. In facie namque prudentis, uidelicet Saluatoris, lucebat sapientia diuinitatis, quam ipse in carne apparens, uirtutum & doctrinæ testimonia demonstrabat et confirmabat.

Oculi

D. SALONII EXPLICATIO.

Oculi uero stultorum, id est, Iudæorum non credentium, magis incendebantur terrenis desiderijs, q̄ salutaribus eius monitis atq; doctrinis. Ver. Quid est hoc quod ait, Donum hominis dilatat uiam eius & ante principes spacium ei facit? Quod est hoc donum quod dilatat uiam hominis? quod ante principes facit illi spacium? Sal. Donum hoc donum est charitatis siue aliarum uirtutū, quas a Domino fideles accipiunt, hoc uidelicet donū hominis, dilatat uiam eius, id est, actionē, quia unusquisq; fidelis quanto amplius gratia sancti spiritus intus repletur, tanto magis uiam suam foris dilatat, id est, bonorū operum gressum multiplicat, quia quotidie in sanctis desiderijs & bonis operibus crescit & auget. Ver. Hoc donū quomodo facit homini spatiū ante principes? Sal. Quia inter magnos Ecclesiæ rectores in foro tribuit illi culmen honoris, & gloriam æternæ beatitudinis. Ver. Quare dicit, Abscondit piger manum suam sub ascella, nec ad os suū applicet eam? Quis enim est tam piger, qui comedendo uel bibendo manum ad os suum non applicet? Sal. Qui abscondit manum suam sub ascella, nō uult utiq; ad aliud quod opus uel laborem extendere illam, ergo per pigrū designatur unusquisq; segnis & desidiosus prædicator, qui non uult opere implere quod dicit. Manum quippe ad os porrigere, qui studet opere implere quod docet. Ver. Quis est ille piger, de quo

dicit, Propter frigus piger arare noluit, mendicabit
 ergo æstate, & nō dabitur ei? Quod si piger tempo-
 re frigoris arare noluerit, nunquid æstatis tempore
 qui sibi aliquid tribuat inueniri non poterit? Sal.
 Sæpe nanq; pigri & frigore & æstatis tempore inue-
 niunt, qui sibi tribuant eleemosynam, fideles, sed
 piger in hoc loco illum significat, qui propter desidi-
 am, & huius mundi aduersitatem, quæ per frigus de-
 signatur, in Dei seruitio negligit laborare, & idcirco
 in futuro die iudicii mendicabit, quia non habebit
 opera bona, pro quibus mereatur accipere beatiudi-
 nem, quoniam quicquid seminauerit homo, hoc &
 metet. Ver. Cur ergo dies iudicii & regnum Dei
 æstati comparatur? Sal. Quia tunc omnia nostræ
 tristitiæ nubila transibunt, & uitæ illius dies æterni
 solis claritate fulgebit. Ver. De quo rege dicit;
 Rex qui sedet in solio iudicii, dissipat omne malum
 intuitu suo? Sal. De illo qui est rex regum, & do-
 minus dominantium, uidelicet Domino Iesu Chri-
 sto, qui sedet in solio iudicii, quia pater non iudicat
 quenquam, sed omne iudicium dedit filio. Ipse nimi-
 rum dissipat omne malū intuitu suo, quia respectu
 potentia omne malum etiam secretarum cogitatio-
 num penetrabit, ut reddat secundum quod egit, un-
 de in Euangelio dicit: Nihil opertum quod non re-
 ueletur, & occultum, quod non sciatur. Tunc iustis
 cum Domino coronatis, soli reprobi pœnas subi-
 bunt

D. SALONII EXPLICATIO.

bunt eternas. Ver. Quid est quod ait, Pondus & pondus, mensura & mensura, utrūq; abominabile apud Deum? Sal. Pondus & pondus, mensuram & mensuram dicit, diuersum pondus & diuersam mensuram. Quantum ergo ad literam, quicumq; in domo sua uarium habet pondus, uariamq; mensuram, propter hoc utiq; habet, ut aliter libret metaturq; sibi, atq; aliter proximo, quod est utiq; abominabile Domino, unde in lege Moysi, Dominus praecepit, dicens: Sit tibi æquus modius, iustusq; sextarius. Ver. Quomodo autem spiritualiter intelligi debet? Sal. Ille in domo sua diuersum habet pondus, & diuersam mensuram, qui semper in suis actibus quaerit, unde ipse laudetur, & in aliorū actibus perscrutatur, unde ipsi uituperentur. Iste utiq; talis abominabilis est Deo, quia nimirum quantum sibi placere desyderat, tantum displicet Deo, qui omnia cordis secreta rimatur. Ver. Quomodo intelligendum est quod ait, Malum est, malum est, dicit omnis emptor, & cum recesserit, tunc gloriabitur? Sal. Secundum literam solet emptor uituperare quod emere desyderat, et dicere, Malum est, malum est, uerum tamen si bene emerit, gloriabit, cū recesserit. Ver. Spiritualiter autem quomodo intelligi debet? Sal. Ille ueraciter est emptor, qui sibi æterna in coelis præmia comparare desyderat. Ipse nimirū emere studet terrenis coelestia, caducis mansura, temporalibus

IN PARAB. SALOMONIS

æterna. Talis ergo emptor quicquid patitur in præ-
 senti, malum esse dicit, quia malum esse intelligit. At
 tamen quia omnia aduersa pro Deo patiēter sustinet,
 cum recesserit de mundo, tunc gloriabitur, quia per-
 ueniet ad beatitudinem. Ver. Item, quomodo in-
 telligendum est, quod paulo post dicit, Hæreditas
 ad quam festinatur in principio, in nouissimo bene-
 dictione carebit. Sal. Hæreditas hæc acquisitio au-
 ritie potest intelligi, ergo quicumque per auaritie ne-
 quitiam in hac uita sibi diuitias multiplicare desyde-
 rant, necesse est, ut in futuro æternæ hæreditatis bea-
 titudinem amittant. Aliter, quicumque pro bonis ope-
 ribus humanam laudem quærere desyderant, in prin-
 cipio quasi ad hæreditatem festinant, ideoque in no-
 uissimo benedictione carebunt, quia nullam remun-
 rationem percipient a Deo. De talibus enim scri-
 ptum est: Amen dico uobis, quia receperunt merce-
 dem suam. Ver. Quid est quod ait, Ruina homi-
 nis est deuorare sanctos, et post uota tractare. Quid
 est hoc, deuorare sanctos. Sal. Deuorare sanctos,
 est uoto se obligare. Impii autem deuorabant sanctos,
 quod uoto se obligabant, ubi persequerentur sanctos,
 & occiderent eos, quemadmodum quadraginta uiri
 Iudæi, sicut in Actibus Apostolorum loquitur: De-
 uouerunt se non manducatuos neque bibituos, do-
 nec occiderent Paulum. Et Pagani, ut sæpe legimus,
 diis suis deuouerunt sanguinem Christianorum. Ver.
 Quid

D. SALONII EXPLICATIO.

Quid est quod ait, Et post uota tractare? Sal. post uota promissa tractare, est sanctos persequi & distrahere, & quasi uile mancipiū cōtemnere? Ver. Quomodo ergo ruina est hominis, deuorare sanctos, & post uota tractare? Sal. Si cū peccatū est alicui homini nocere, multo magis peccatum est, cum aliquis sanctos Dei persequitur, aut offendit, aut lædit, & idcirco ruina est illi, qui persequendo sanctos, æternæ damnationis sibi preparat interitū. Ver. Quomodo intelligendum est quod ait, Sicut diuisiones aquarū, ita cor regis in manu Dei? Quare dixit cor regis tantum esse in manu Dei, & non omnium hominum? cum alibi scriptum sit: In manu eius sunt omnes fines terræ. Si omnes fines terræ in manu, hoc est, in potestate Dei sunt, & corda omnium hominum sunt in manu eius. Sal. Regem in hoc loco nō illum debemus intelligere, qui rex est solo nomine, & temporaliter aliis imperat, sed unumquemque uirum sanctum, fidelem, atque religiosum Christianum, cuius milites sunt sacræ uirtutes, & ipse uitiorum bella in se bene uincere nouit. Sicut ergo Deus multifariis diuisionibus aquarum late fines terrarū & aeris implet, ita cor regis quocunque uoluerit, inclinabit, id est, ad quodcūque bonū uoluerit, conuerteret, quoniam sicut diuisiones gratiarum Angelis & hominibus iuxta uoluntatem suam tribuit, ita corda regum, id est, sanctorum uariis donis replet, & diuer-

lis ornat muneribus. Ver. Quid est quod ait, Vir qui errauerit a uia doctrinæ, in coetu gigantum comorabitur? Qui sunt isti gigantes, in quorum coetu morabitur, qui errauerit a uia doctrinæ? Sal. Gigantes appellat immundos spiritus, id est, dæmones, de quibus beatus Hiob dicit: Ecce gigantes gemunt sub aquis, & qui habitant cum eis, id est, dæmones, & omnes quos ipsi deceperunt, & qui sibi consenserunt sub pœnis torquentur. Ver. Quare dæmones appellantur gigantes? Sal. Quia dæmones superbi & elati sunt, & male fortes, sicut olim fuerunt gigantes. In coetu ergo istorum gigantum, id est, dæmonum comorabuntur omnes, qui errauerunt a uia doctrinæ, id est, a uia ueritatis, quia simul cum demonibus torquebuntur in pœna æternæ damnationis. Ver. Quæ est ciuitas fortium, uel quis est sapiens, de quo dicit, Ciuitatem fortium ascendit sapiens, & detraxit robur fiduciæ eius? Sal. Ciuitatem appellat mundum, fortes dæmones. Mundus iste quondam ciuitas fortium erat, quia idolorum cultui deditus, dæmonibus seruebat, & fiduciam uitæ in cultu habebat, qui non sunt dii, sed opera manuum hominum. Ver. Quis est ergo ille sapiens, qui hanc ciuitatem fortium ascendit? Sal. Ille filius uirginis, Dei uirtus & Dei sapientia, qui tunc ciuitatem hanc ascendit, quando natus in carne uisibilis, mundo apparuit. Ipse nimirum destruxit robur fiduciæ eius, quia sub

uertit

D. SALONII EXPLICATIO.

uertit & abstulit de mundo cultum Deorum, in quibus confidebant gentiles. Ver. Quid est quod ait prouerbium, Adolefcens iuxta uiam suam, & iam cum senuerit, non recedet ab ea? Nunquid non multi recedunt a uia sua mala, quā ambulauerant in adoleſcentia? Sal. Vere plurimi inſpirāte diuina gratia in ſenectute cōuertuntur a uitiiſ, quæ habuerunt in adoleſcentia, nec Salomon hoc fieri poſſe negat. Sed frequentius hoc contingere ſolet, ut mores quos homo diſcit in adoleſcentia, non eos mutet in ſenectute, attamen non ſemper ita euenire confirmat, & idcirco ponit huiuſcemodi prouerbium, ut omnes admoneat, quatenus a prima ætate uirtutibus & bonis operibus ſtudeant inſudare, ne forte in ſenectute non poſſint ſtudia bonorum operum diſcere, quæ neglexerunt in tenera ætate. Ver. Quid eſt quod dicit, Fovea profunda os alienæ? Quæ eſt hæc aliena? cuius os eſt magna fouea? Sal. Os alienæ dicit os meretricis, qui ergo uerba meretricis libenter audit, & oscula eiꝯ delectabiliter ſuſcipit, quaſi ianuam pulſat profundæ foueæ, id eſt, inferni, & niſi cito ſe ab eiꝯ colloquio uel osculo ſubtrahat, deſerēte ſe Deo, illico mergitur in foueam mortis, & hoc eſt quod dicit, Cui iratus eſt Dominus, incidet in illam. Ver. Quid eſt quod ait, Appone cor ad doctrinā meam? Et paulo poſt ſubiungit: Ecce deſcripſi eam tibi tripliciter in cogitationibus & ſcientia, ut oſtenderem

IN PARAB. SALOMONIS

tibi firmitatem & eloquia ueritatis. Quomodo tripliciter descripsit doctrinam suam & scientiam? aut quid est apponere cor, & intelligere doctrinā? Sal. Tripliciter uero doctrinam suam describit, quia unicuique præcipit, ut eam studeat implere cogitatione, locutione & opere. Ver. De quibus terminis dicit, Ne transgrediaris terminos antiquos, quos posuerunt patres tui? Sal. Terminos antiquos dicit terminos ueritatis & fidei, quos statuerunt ab initio catholici doctores. Hoc ergo præcepit, ut ueritatem sacræ fidei & Euangelicæ doctrinæ nemo aliter suscipiat, quā a sanctis patribus est tradita. Siue hoc præcipit, ut eloquia sanctarum scripturarum nemo aliter interpretetur, nisi iuxta uniuscuiusque scribentis intentionē. Ver. Quæ sunt opes illæ, de quibus dicit, Ne erigas oculos tuos ad opes, quas habere non potes, quia facient sibi pennas, & uolabunt in coelum? Quas pennas sibi opes, id est, diuitiæ seu copię facere possunt? Sal. Opes istæ sunt arcana diuinitatis, & secreta cœlestium mysteriorum, & est sensus: Ne erigas oculos tuæ mentis ad perscrutanda diuinitatis arcana, & mysteriorum cœlestium secreta, quæ penetrare non potes, nec intelligere uales, quoniam solis aquilis hæc patent, id est, supernis ciuibus tantū manifesta sunt. Ver. Quæ sunt cellaria, de quibus dicit, In doctrina replebuntur cellaria uniuersa substantia præciosa & pulcherrima? Sal. Cellaria sunt

D. SALONII EXPLICATIO.

sunt corda iustorum, qui per doctrinam sapientiæ replentur substantia præciosa & pulcherrima, id est donis uirtutum atq; bonorū operum. Ver. Quid est quod dicit, Septies enim cadit iustus, & resurget? Si iustus est, quomodo cadere, id est, peccare dicit? Sal. Loquitur em̃ hic Salomon de leuibus et quotidianis peccatis, sine quibus nullus iustorum in hac uita esse potuit, necesse potest, ut alibi dicit: Benedicam Domino in omni tempore. Septies etiam significat aliquando, sæpe & frequenter, quod aptissime hic intelligi potest, Septies, hoc est, sæpe cadet iustus & sæpe resurget, aut certe omni tempore cadit & resurgit, scilicet gratia diuina, secundū quod supra dictum est. Ver. Quomodo intelligendum est, Præpara opus tuum foris, & diligenter exerce agrum tuum, ut postea ædifices domum tuam? Quod est hoc opus, quod foris præparare debemus? Sal. Opus uocat bonam actionem, idēq; addidit tuum, hoc est, tibi utile & necessarium. Opus ergo nostrum foris præparamus, cum actionem nostram bene exterius componimus, & ut Deo placeat, ordinamus. Ver. Quomodo agrum nostrum diligenter exerceamus? Sal. Agrum diligenter exercemus, si a spinis uitiorum corpus nostrum purgamus. Ver. Post agri exercitium domum nostram quomodo ædificabimus? Sal. Si primo exterius actus nostros bene cōponimus, tunc domum nobis bene ædificamus,

cum puritatem uitæ, & munditiam etiam cogitationum seruamus, & habitaculum nostræ mentis piis cogitationibus exornamus. Ver. Quis est Dominus, aut qui sunt reges, de quibus dicit, Glória Domini, est cælare uerbum: gloria regum, inuestigare sermonem? Sal. Dominus iste Dei filius est, uidelicet Dominus Iesus, cuius gloria fuit cælare Verbū, id est, se esse Dei filiū, quia dum in carne apparuit, magis se hominem, q̄ Dei filium confiteri uoluit, ut diabolus eum non cognosceret, & ita passione sua genus humanum redimeret. Quoniam si eum diabolus cognouisset Dei filium esse, nunquam crucifixisset. Gloria quippe Domini fuit cælare Verbum, id est, in forma hominis, diuinitatis suæ occultare potentiam, ut dum infirmitatem carnis ostenderet diabolus, eum a passione retrahere festinaret, quatenus per ignorantiam passionis perueniret ad gloriam resurrectionis. Ver. Qui sunt ergo reges, quorū gloria est, inuestigare sermonem? Sal. Reges isti sancti fuerunt Apostoli, qui diligenter sermonem Domini inuestigare studebant, quo se Domini fore significabant. Nam ubi nō aperte se Dominum esse monstrabat, sed mystice uolebat intelligi, eius sermonem summa perscrutabatur diligentia, quale est illud: Ego & pater unum sumus &c. Nam cum cæla-
ret Verbi diuinitatē, & ostenderet carnis infirmitatem, interrogauit hos reges, dicens: Quem dicunt
homines

D. SALONII EXPLICATIO.

homines esse filium hominis? Cui regum eximius, uidelicet beatus Petrus Apostolus, inuestigans sermonem illius, quem antea sæpe audiuit, continuo respondit: Tu es Christus filius Dei uiui. Ver. Quid est quod sequitur, Cœlum sursum, & terra deorsum, & cor regum inscrutabile esse dicunt. Sal. Reges uocat Prophetas & Apostolos, qui reuelante sancto spiritu arcana diuinitatis cognoscere meruerunt. Per cor regū designatur scientia & intellectus Prophetarum & Apostolorum. Ver. Quomodo ergo intelligendum est quod ait, Cœlum sursum, & terra deorsum, & cor regum inscrutabile? Sal. Stetit altitudo cœli, & profunditas terræ comprehendi nō potest ab hominibus, ita nostræ fragilitatis capacitas non ualet comprehendere, neq; penetrare altitudinem scientiæ & intellectus Prophetarū & Apostolorum. Ver. Quomodo sibi concordant, aut quomodo sibi conuenire possunt ea quæ dicit, Ne respondeas stulto iuxta stultitiam suam, ne efficiaris ei similis: & Responde stulto iuxta stultitiam suam, ne sibi sapiens esse uideatur? Istæ nimirum sententiæ ualde sibi uidentur esse contrariæ. Sal. Vere bene sibi concordant, si eas diligenter consideremus. Per hoc enim quod ait, Ne respondeas stulto iuxta stultitiam suam, nos admonet, ut quia stultus sapientiam non percipit, nos eius stultitiam non imitemur, sed potius contemnamus & despiciamus, & quoties ei

loquimur, non turpiter, non furiose, non superbe, sed honeste, patienter atq; humiliter hoc loquamur sapiēter, ne illi similes efficiamur. Per hoc uero quod sequitur, Responde stulto iuxta stultitiam suam nos admonet, ut sapienter increpemus & redarguamus stultum, & manifeste demonstramus, quanta sit in eo stultitia, ne forte si non agnoscat stultitiam suam, se putet esse sapientem. Ver. Quis est ille susurro, de quo dicit, Verba susurronis quasi simplicia, & ipsa perueniunt ad interiora uentris? Sal. Susurro nem appellat incētozem litis, & bilinguem, qui laudes uerborum simulat, & ideo quasi simplicia esse uidentur uerba ipsius. Sed perueniūt ad interiora uentris, quia susurro semper quærit audire, unde possit iurgia seminare, quibus stomachus indignetur, & omnia interiora perturbentur. Ver. Quis est ille amor absconditus, de quo dicit, Melior est manifesta correptio, q̃ amor absconditus? Sal. Amorem absconditum in hoc loco amorem uocat illicitū, id est, libidinosum, ut est amor adulterinus, qui pro sua turpitudine absconditur, ne a sapientibus redarguatur. Melior est ergo manifesta correptio, q̃ amor absconditus, quia multo melius est, aliquem ut corrigatur, manifeste increpare, q̃ studio simul peccandi occulte diligere. Ver. Quid est quod ait, Anima saturata calcabit fauum, anima esuriens amarum pro dulce sumet? Quomodo anima saturata fauum calcet? Sal

D. SALONII EXPLICATIO.

cat. Sal. Iuxta literam anima saturata fauū calcat, quia quicumq; cibis repletus est, & dulcem contemnit ac despicit escam. Qui uero esurit, licet aliquam in cibis amaritudinem sumat, paruipendit. Ver. Spiritualiter autem quomodo intelligenda est hæc sententia? Sal. Anima saturata est anima diuitum, qui in præsentī uita habent consolationē suam, quoniam rerum temporalium copiis abundant. Vnde Dominus in Euangelio ait: Væ uobis qui saturati estis, quia esurietis. Anima ergo diuitum calcat fauū quia pro terrenis bonis spernit dulcedinē regni cœlestis. Anima uero esuriens & amarum pro dulci sumit, quoniam qui esurit & sitit iustitiam, omnem amaritudinem pro dulcedine sumit, quia patienter sustinet omnem præsentis uitæ aduersitatē pro amore supernæ dulcedinis; id est, æternæ beatitudinis. Ver. Cui loquitur Salomon, cum dicit, Diligenter agnosce cultum pecoris tui, tuosq; greges considera? Nunquid lanigeros docet considerare greges? Sal. Non, loquitur enim pastori Ecclesiæ, et est sensus, Diligenter curam impende, quibus præpositus es, & agnosce animos & actus singulorum, & si aliquam sorditatem uitiorum inueneris, citius castigare & emendare stude. Ver. Quare mox subiungit Non em̄ habebis iugiter potestatem, sed corona tribuetur in generationem generationū? Sal. Ut pastor Ecclesiæ ouibus sibi commissis incessanter curam ad

IN PARAB. SALOMONIS

hibeat, & est sensus, Non enim tu semper habebis potestatem pascendi oues Dominicas, sed corona tribuetur in generatione generationum, id est, æterna præparata est corona, quam & tu percipies, si bene paueris Dominicas oues. Ver. Quid necesse fuit Salomoni dicere, Aperta sunt prata, et apparuerunt herbæ uirentes, & collecta sunt scæna de montibus? Quis enim hoc dicit quod ignorat? Sal. Vere nullus, si hæc uerba tantum iuxta literam accipimus. Ver. Quomodo intelligenda sunt? Sal. Vere tantum spiritualiter. Ver. Quid ergo prata significant? Sal. Per prata designantur cœlestia mysteria quæ ideo prata dicuntur, quia pascua sunt animarum fidelium. Hæc enim prata, hoc est, diuina mysteria diu clausa fuerunt sub typis ac figuris legalibus. Ver. Quomodo, & quando aperta sunt hæc prata? Sal. Aperta quippe sunt prata, quia per gratiâ Domini Saluatoris reuelata sunt cœlestia sacramenta, quando aperuit discipulis suis sensum, ut intelligerent scripturas. Tunc apparuerunt & herbæ uirentes, hoc est nouæ sententiæ Euangelicæ ueritatis et gloriæ. Ver. Quid significant scæna, quæ collecta sunt de montibus? Sal. Per montes designantur sancti patres ueteris testamenti scriptores. Per scæna scripta eorum. Collecta sunt scæna de montibus, quia scripta sanctorum ueterum patrum collecta sunt ad pabulum & ad refectiorem ouium Dominicarum, id est, animarum si

D. SALONII EXPLICATIO.

rum fidelium. Ver. Quid est quod ait, Pauper & creditor obuiauere sibi, utriusq; illuminator est Dominus? Quis est iste pauper & iste creditor, qui sibi obuiauere? Sal. Pauper est humilis uerbi Dei auditor, creditor autem est, qui pauperi, id est, humili auditori pecuniā uerbi Dei predicando committit. Ver. Quando pauper & creditor obuiant sibi? Sal. Quando in unam eandemq; auditor simul & prædicator diuinæ pietatis gratiam conueniunt, unde pulchre sequitur, Vtriusq; illuminator est Dominus, quia sine gratia diuinæ pietatis nec ille potuit prædicare, nec iste credere. Ver. Quid est quod ait, Cum prophetia defecerit, dissipabitur populus? Quæ est hæc prophetia, qua deficiente, populus dissipabitur? Sal. Prophetia est sacerdotalis eruditio atq; doctrina. Ergo cum cessauerit doctrina & eruditio sacerdotū, populus dissipabitur, quia cum deest admonitio & increpatio sacerdotum, suæ uoluntati & arbitrio relinquitur, & continuo uariis peccatis uitiisq; corrumpitur. Ver. Quomodo ignitus clypeus est omnis sermo Dei, licenim dicit Salomon: Omnis sermo Dei ignitus clypeus est sperantibus in se? Sal. Omnis sermo diuinæ autoritatis idcirco ignitus clypeus dicitur, quia corda electorū, quæ spem suam in Deo ponunt, & igne charitatis accendit, & scientia ueritatis illuminat, & sordes uitiorum, quas in eis reperit, consumit, & purgat, & ab

IN PARAB. SALOMONIS

insidiis hostium, cunctisque defendit aduersitatibus. Ver. Quæ est sanguisuga, cuius duas dicit esse filias licenim ait, Sanguisugæ duæ sunt filiæ, dicentes, affer affer, & nunquam satiantur? Sal. Sanguisuga diabolus est, qui semper sanguinem sitit, id est, ad peccata homines trahere cupit, & sitim peccandi incessanter accendit. Ver. Quæ sunt illæ duæ filiæ sanguisugæ, dicentes, affer affer, & nunquam satiantur? Sal. Luxuria uidelicet & auaritia, istæ nimirum spiritualiter diaboli sitim & ardorem imitantur, quia sicut nunquam peccando satiantur, sic nec auaritia nec luxuria. Nam quanto quisque magis luxuriatur & fornicatur, tanto amplius delectatur. Similiter quanto quisque sibi diuitias accumulât, tanto magis eas semper augmentare desyderat. Ver. Quare posuit Salomon exemplū stellionis, dicens: Stellio nutritur manibus, & commoratur in edibus regis. Sal. Vt pigros & ingenio tardos ad operandum & benedicendum prouocaret. Ver. Quod genus animalis est stellio? Sal. Genus lacertæ ualde pigræ, & colore uario, unde nomen accepit stellio, quia quasi stellis, id est, guttis distinctus & uariatus est. Ver. Quid ergo significat stellio? Sal. Illos significat, qui tardi sunt ingenio, & tamen quotidiano studio et diligentia magis æternam aulam conscendunt, hoc est, quamuis cum magno labore ad noticiam sacrarum scripturarum perueniunt, & pe-

netrare

D. SALONII EXPLICATIO.

netrare ualent secreta cœlestium myſteriorum. De talibus ſcriptum eſt in Euangelio: Qui habet, & dabitur ei, & abundabit, quoniam qui habuerit ſtudi-
um legendi, dabitur ei facultas intelligendi. Ver.
Quæ ſunt illa tria, de quibus Salomon dicit, Tria ſunt quæ bene gradiuntur, & quartum, quod ince-
dit foeliciter. Sal. Leo fortiſſimus beſtiarum, qui ad nullius pauet occurſum, Gallus ſuccinctus lum-
bos, & Aries, nec eſt rex qui reſiſtat ei. Iſta ſunt quæ bene gradiuntur. Ver. Quem ſignificat iſte leo?
Sal. Illum, de quo ſcriptum eſt: Sicut leo de tribu Iuda etc. Dominum ſcilicet Ieſum Chriſtum, qui for-
tiſſimus beſtiarum dicitur, quia quod infirmum eſt Dei, fortius eſt hominibus. Ver. Quod eſt illud infirmum Dei?
Sal. Infirmum fuit Dei, carnem noſtræ mortalitatis aſſumere, ſed hoc fortius eſt homi-
nibus, quia ipſe homo natus ex uirgine perfectus exiit Deus. Ver. Quare iſte leo ad nullius pauet occurſum?
Sal. Quia peccatum nõ fecit, nec eſt inuentus dolus in ore eius, unde ipſe dicit in Euange-
lio: Ecce uenit princeps mundi, & in me non inue-
nit quicquam. Ver. Quid ſignificat gallus ſuccin-
ctus lumbos? Sal. Sanctos prædicatores. Ver. Quare galli prædicatores dicuntur? Sal. Quia in-
ter præſentis uitæ tenebras uerum mane, hoc eſt, ue-
ram lucem prædicando, annunciant gloriam uideli-
cet æternæ beatitudinis. Ver. Quare iſti galli ſuc-

cincti lumbos dicuntur? Sal. Quia sancti prædicatores in membris suis luxuriam & libidinem restringunt. Ver. Quid significat aries, cui non est rex qui resistat? Sal. Per arietem sancti designantur confessores & sacerdotes, qui ueluti arietes gregem præcedunt, quia populum fidelem per exempla sua gradientem ducunt. Isti nimirum arietes si spiritualiter & recte uiuant, nullus est rex, qui eis resistere ualeat, quia nullus est tam sæuus persecutor, qui eorum intentionem ualeat impedire, quia etsi eis mala ingeruntur, omnia patienter sustinent pro Christo. Ver. Quid est illud quartum, quod incedit foeliciter? Sal. Ille, qui stultus apparuit, postquam erectus est in sublimi. Ver. Quis est ille? Sal. Antichristus, qui eleuabitur in sublime, hoc est, in excelsum, quia cum fuerit homo nequissimus, dedignabitur se filium Dei nominare, sed mentietur se esse Deum. Ver. Eleuatus in sublime quomodo stultus apparebit? Sal. Quia in ipsa elatione & superbia sua subito diuino gladio percussus interibit. Ver. Quare de illis superioribus dicit, Tria sunt quæ bene gradiuntur? de isto uero, Quartum quod incedit foeliciter. Quare similiter de isto non dixit, incedit bene, sed ait foeliciter? Sal. Quia omne quod foeliciter incedit, semper non bene incedit: neque omne quod incedit bene, semper foeliciter. Ver. Quæ sunt ergo quæ incedunt bene, aut quæ foeliciter? Sal. Illa bene incedunt,

D. SALONII EXPLICATIO.

Incedunt, quæ ambulant sancte & iuste. Illa incedunt
 foeliciter, quæ in hac uita habent prosperitatē suam.
 Leo, gallus & aries bene gradiuntur, sed non foelici
 ter. Quia & Christus Dei patris uoluntatē in omni
 bus compleuit, sed multa aduersa, & mortem susti
 nuit. Similiter sancti prædicatores & confessores di
 uinam student adimplere uoluntatem, sed multas
 in hac uita sustinent persecutiones. Antichristus ue
 ro non bene incedit, quia superbus contra Dei uo
 luntatem omnia faciet. Sed incedet foeliciter, quia,
 quis ad breue tempus, in magna erit gloria & pro
 speritate. Ver. Quis est ille rex Lamuhel, de quo
 dicit, Verba Lamuhel regis uisio, qua erudiuit eum
 mater sua? Sal. Lamuhel Hebræa lingua dicit, La
 tine interpretat, in quo Deus. Ipse nimirum est Sa
 lomom rex Israhel, in quo fuit Deus, quia nisi Deus
 in eo mansisset, tot & tanta diuina mysteria nec intel
 ligere, nec scribere potuisset. Ver. Quæ fuit mater
 eius, quæ erudiuit eum, & docuit uisionem? Sal.
 Secundum literam potest intelligi carnalis eius ma
 ter Bersabæ regina, quæ prudenter illum docuit.
 Sed mater in hoc loco nulla melius intelligitur, q̃ spi
 ritualis & diuina gratia, quæ illum in corde inuisi
 biliter erudiuit & docuit intellectum sapientiæ, quā
 ipse foris hominibus & prædicauit et scripsit. Ver.
 Quæ est mulier illa fortis, de qua dicit, Mulierem
 fortem quis inueniet? procul & de ultimis finibus

IN PARAB. SALOMONIS

precium eius? Sal. Mulier fortis appellatur sancta Ecclesia catholica, quæ ideo mulier dicitur, quia Deo spirituales generat filios ex aqua & spiritu sancto. Fortis ideo dicitur, quia cuncta seculi huius aduersa simul & prospera, propter fidem & amorem sui conditoris ac redemptoris contemnit & despicit. Ver. Quare dixit Salomon, Mulierem fortem quis inueniet? Sal. Quia per spiritum sanctum cognouit, quomodo nullus prophetarum, nullus omnino electorum sufficeret ad redemptionem humani generis, nisi solus mediator Dei & hominum, homo Christus Iesus, ideoque ait, Mulierem fortem quis inueniet? subauditur nisi Christus. Ver. Quare mox addidit, Procul, & de ultimis finibus precium eius? Sal. Ut ostenderet quia non suo tempore, sed longe post eum nec similis illi uenturus erat Christus, id est, purus homo peccatorum sordibus, sed in fine seculorum descensurus erat de coelis Dei filius, qui natus ex uirgine, perfectus esset Deus & homo, & hoc est quod ait, Procul, id est, longe post, significat autem tempus quod fuit a diebus Salomonis, usque ad partum uirginis. De ultimis uero finibus dicit, quia a summo coelo egressio eius. Ver. Quod precium dedit Dominus pro hac muliere? Sal. Semetipsum, sicut dicit Apostolus: Qui dilexit nos, & tradidit semetipsum pro nobis oblationem & hostiam in odorem suauitatis. Ver. Mulier fortis quomodo facta est quasi nauis

D. SALONII EXPLICATIO.

Nauiſ inſtitoris: ſicẽm dicit Salomon, Facta eſt qua-
 ſi nauiſ inſtitoris, de longe portans panem ſuum.
 Sal. Inſtitor dicitur negociator propterea, quia ſem-
 per inſiſtit, ut acquirat & multiplicet merces & lucra
 ſua. Nauiſ ergo inſtitoris onuſta diuerſis mercimo-
 niis, quæ in ſua patria magis abundât, per mare per-
 git ad loca peregrina, ut illic uenditis omnibus illis,
 quæ attulit, chariora domum reportat. Sic ergo mu-
 lier fortis, id eſt, ſancta eccleſia ſemper deſyderat one-
 rari uirtutum diuitiis, & abundare bonis operibus,
 nauigans per mare ſeculi huius, ut per ea mereatur,
 id eſt, acquirat maiora, id eſt, diuinæ gratiæ dona.
 Ver. Quis eſt huius nauiſ inſtructor? Sal. Domi-
 nus Ieſus Chriſtus, qui dedit preciũ ſanguinis ſui,
 & redemit Eccleſiam. Sancta ergo Eccleſia ad exem-
 plum inſtructoris, hoc eſt, Domini ac redemptoris
 ſui ſemper ſibi multiplicare laborat uirtutũ atq; bo-
 norum operum lucra, ut per ea mereatur maiora ac-
 quirere, id eſt, æternæ beatitudinis præmia, & hoc
 eſt quod ait, De longe portans panem ſuũ, quia in
 omnibus bonis quæ temporaliter agit, ſolam tantum
 uiui panis facietatem deſyderat, quia eternam ſolum
 modo retributionem expectat. Ver. Quid eſt di-
 cere, Sindonẽ fecit & uendidit, & cingulum tradi-
 dit Chananæo? Sal. Sindonẽ fecit Eccleſia, & uen-
 didit, quia fidem quam credendo texuerat, loquen-
 do dedit, ac ab infidelibus fidem rectæ conuerſatio-

nis accepit, quare & Chananaeo cingulum tradidit, quia per vigorem demonstratae iustitiae fluxa opera gentilitatis astrinxit, unde hoc quod percipitur, uiuendo teneatur. Ver. Quid est quod ait, Stragula tam uestem fecit sibi, Byssus & purpura indumentum eius. Quae est stragulata uestis? Sal. Stragulata uestis est, quae uariata textura firmissima fieri solet. Ver. Quid ergo significatur per stragulatam uestem? Sal. Fortia opera sanctae Ecclesiae, & diuersa uirtutum ornamenta, de quibus propheta dicit: Astitit regina a dextris tuis in uestitu deaurato, circumdata uarietate. Ver. Byssus & purpura quomodo indumentum eius mulieris, id est, sanctae Ecclesiae est? Sal. Byssus, est genus lini candidissimi, unde pulchre per byssum designatur corporis castitas, & sanctae conuersationis puritas. Per purpuram uero sanguinis effusio designatur. Fortis ergo mulier, id est, sancta Ecclesia induit se bysso Dei, id est, seruat corporis castitatem, & sanctae conuersationis rutilat nitore. Induit et se purpura, quando in ea sancti martyres pro Christi nomine sanguinem fundunt. Ver. Si byssus & purpura indumentum est sanctae Ecclesiae, cur ergo dicit in sequentibus, Fortitudo & decor indumentum eius, & ridebit in die nouissima? Sal. Nulla est contrarietas, quia fortitudo refertur ad purpuram, decor uero ad byssi candorem. Est ergo fortitudo indumentum Ecclesiae sanctae, quia propter si

D. SALONII EXPLICATIO. 11

pter fidem Christi, & iustitiã patienter sustinet maiorum hominum improbitatem & persecutionem. Est & decor indumentum eius, quia operatur iustitiã, & se uirtutum grãtia ornat. Ver. Quare autem dicit, Ridebit in die nouissima, cum Dominus dicat in Euangelio: Væ uobis qui ridetis, quia lugebitis & flebitis? Sal. In scripturis sacris risus gaudium significare solet, unde Dominus in Euangelio: Beati qui nũc fletis, quia ridebitis, id est, gaudebitis. Et beatus Hiob dicit: Os autem ueraciũ replebitur risu, id est, gaudio. Mulier ergo fortis, id est, sancta Ecclesia ridebit in die nouissimo, id est, gaudebit in tribulatiõe regni coelestis. Ver. Qui sunt filii mulieris, qui eam beatissimam prædicauerũt? aut quis est uir eius, qui laudauit eam? sic enim dicit: Surrexerunt filii eius, & beatissimam prædicauerunt filii eius, & uir eius laudauit eam. Sal. Filii huius mulieris, id est, sanctæ Ecclesiæ, sunt omnes electi, uir eius Dominus est Iesus Christus. Surgent em̃ filii Ecclesiæ, uidelicet omnes electi de puluere terræ, in nouissimo die iudicii & immortalitatis gloria decorati, matrem suam beatissimam prædicabunt, id est, laudabunt sanctã Ecclesiam, quæ illos genuit Deo ex aqua & spiritu sancto. Surget & uir eius, Dominus uidelicet Iesus Christus, cum in die iudicii manifestus apparuerit in potentia diuinitatis, & laudabit eam, dicens in iudicio: Venite benedicti patris mei, possi-

IN PARAB. SALOMONIS

dete paratum uobis regnum ab initio mundi, Esurt
 ui, & dedistis mihi manducare &c. Ver. Cur ergo
 posuit præteritum, dicens: Surrexerunt: debuit em̃
 dicere, surgent. Sal. Quod ergo Salomon futurũ
 nouerat, certissimum tenebat, & ideo more prophe
 tico præteritum posuit pro futuro. Ver. De qui
 bus dicit quod sequitur, Multæ filiae congregauerũt
 diuitias, tu supergressa es uniuersas: Sal. Multas fi
 lias appellat Ecclesias hæreticorum, & turbas malo
 rum catholicorum. Ver. Quæ filiae dicuntur Chri
 sti uel Ecclesiar: Quare dicuntur filii Christi aut Ec
 clesiar: Sal. Propter fidei ac baptismi sacramentũ,
 & adoptionem filiorum, quam in baptisate perce
 perunt. Ver. Istæ filiae quas diuitias congregaue
 runt: Sal. Orationes, ieiunia, eleemosynas, affli
 ctionem, & castimoniam carnis, linguæ refrenatio
 nem, meditationem scripturarum, et cæterorum bo
 norum operum diuitias, quæ ueræ diuitiæ sunt, si
 spiritali fiant intentiõẽ, uidelicet propter regni cœ
 lestis retributionem, aliter nihil profunt agentibus.
 Vnde filiae uidelicet hæreticorum, aut turbæ malo
 rum catholicorum, frustra congregauerunt sibi di
 uitias, quia uel in fide errauerunt, uel certe huiusmo
 di bona opera non spiritali fecerunt intentione, de
 quibus in Euangelio Dominus: Multi dicunt mihi
 in illa die, Domine domine, nonne in nomine tuo
 prophetauimus, & in nomine tuo dæmonia eieci
 mus, &

D. SALONII EXPLICATIO.

mus, & uirtutes multas fecimus? Et tunc confitebor illis, quia nunquam noui uos. Sancta uero Ecclesia catholica supergressa est, hoc est, transcendit omnes illas filias, quæ quicquid boni agit, in fide tantum recta & spiritali operatur intentione. Ver. De qua gratia, & de qua pulchritudine loquitur, cum dicitur? Fallax gratia, & uana pulchritudo, mulier times Dominum, ipsa laudabitur. Sal. Fallax gratia humanæ laudis, quam hypocritæ ab omnibus exquirunt. Pulchritudo uana est pulchritudo castitatis, uel bonæ operationis, quam hypocritæ hominibus ostendere cupiunt, ut ab eis laudentur. Ver. Quare hæc gratia & hæc pulchritudo fallax dicitur uana? Sal. Quia fallit, hoc est, decipit simulatores, quoniam dum in hac uita quærunt mercedem, in futuro nullam recipient remunerationem, & si castitatem seruāt, uel aliqua bona operant, uana sunt omnia quæ faciunt. Ver. Quæ est mulier timens Dominum? Sal. Sancta uidelicet quæ in hac uita semper manet Ecclesia in timore Domini, quæ semper eius desyderat præcepta implere. Ver. Quomodo ergo laudabitur hæc mulier? Sal. Idem Salomon in fine huius libri manifeste demonstrat, cum dicit: Date ei de fructu manuum suarum, & laudent eam in portis opera eius. Ver. Cuius sunt hæc uerba? Sal. Viri illius Domini & saluatoris nostri Iesu Christi. Ver. Quando hæc uerba dicturus est? Sal. In die iudicii, quan-

IN PARAB. SALOMONIS

do præcipiet Angelis, ut post finem huius uitæ Ec-
clesiam ad regni coelestis gaudia introducant. Sic em
præcipiet Angelis: Date ei de fructu manuum sua-
rum, hoc est, bonorum operum. Nam per manus
opera designantur, ac si patiēter dicat, quia fructum
bonorum operum facere curauit, hoc est, charitatē,
gaudium, pacem, benignitatem, bonitatem, modē-
stiam, continentiam, fidem, patientiam, hoc fructu
dignam illi reddite mercedem. Et laudent eam in
portis opera eius, hoc est, in iudicio, siue in in-
gressu patriæ coelestis laudant eam ope-
ra ipsa quæ fecit, hoc est, remuneretur ei
pro bonis operibus, quæ gessit.

Finis Parabolarum

Salomonis.

D. Salo

D. SALONII

VIENNENSIS EPISCOPI DO-
ctissimi, Dialogus alter, ad Veranium
Fratrem, in quo Ecclesiastes quàm
purissime exponitur.

Colloquuntur Veranius
& Salonius.



ER. QVOT NOMINI
bus uocatus est Salomon?
Sal. Tribus, sicut scriptu
ræ sacrę manifestissime do
cent, id est, Salomon, Ydi
da, & Ecclesiastes. Ver.
Quare his noibus appella
tus est? Sal. Salomon, id
est, pacificus dictus est, eo
q̃ in regno eius pax fuit. Ydida uocatus est, id est, di
lectus Domini, quia dilexit eum Dominus. Ver.
Ecclesiastes qua lingua dicitur? Sal. Græca, nam
Hebraice Coheleht dicitur. Ver. Quomodo so
nat in Latino sermone Coheleht, aut Ecclesiastes?
Sal. Ille proprie dicitur Ecclesiastes, qui cœctum, id
Ecclesiam congregat. Vnde Latino sermone recte
Ecclesiastes dicitur Concionator, quia cōcionatur,
id est, loquitur ad populum, & sermo eius non ad
unum specialiter, sed generaliter dirigĩt ad omnes

IN ECCLESIAST. SALOMONIS

Concionator ergo in Ecclesia sancta dici potest prædicator. Ver. Quot libros ædidi Salomon? Sal. Tres tantum, iuxta numerum uocabulorū suorum, Prouerbia, Ecclesiasten, et Cantica Canticorū. Ver. Quid ait Salomon in Prouerbiis, aut quid docet in Ecclesiaste, uel Cantico Canticorum? Sal. In Prouerbiis docet paruulum, & per uarias sententias instruit quasi filium. In Ecclesiaste uero iam perfectæ ætatis uirū imbuat, ut intelligat, quia in huius mundi rebus nihil est perpetuum, nihil gloriosum aut magnum, sed omnia sunt breuia, caduca, & uana, quæ cernimus. In Cantico Canticorum, iam consummatum uirum atq; perfectum in omnibus, & uariis exornatum uirtutibus, sponsi, id est, Domini nostri Iesu Christi amplexibus iungit. Ver. Spiritualiter autem quid significat ille Salomon, Ydida & Ecclesiastes? Sal. Dominum Iesum Christum, qui est noster Salomon, id est, pacificans omnia per sanguinem suum, fecit utraq; unum, id est, de duobus populis unam sibi construxit Ecclesiam. Vnde Apostolus: Christus, inquit, pax nostra, qui fecit utraq; unum. Ipse est & Ydida, id est, dilectissimus patris filius, de quo ipse pater ad discipulos ait: Hic est filius meus dilectus, in quo mihi bene complacui. Ipse nimirū est Ecclesiastes, id est, concionator noster, qui congregat cœtum, uidelicet sanctam Ecclesiam de uniuerso orbe terrarum, ad quem loquitur, dicens: Discite a me, quia

D. SALONII EXPLICATIO.

me, quia mitis sum & humilis corde, & inuenietis re
 quiẽ animabus uestris. Hic est filius Dauid, ad quẽ
 cæci in Euangelio clamabant, dicentes: Miserere no
 stri fili Dauid. Hic est etiam rex Hierusalem, non ter
 restris, sed illius cœlestis, quæ est mater omnium no
 strorum. Ver. Quid est quod dicit Ecclesiastes,
 Vanitas uanitatũ, & omnia uanitas, cum scriptum
 sit in libro Genesis: Vidit Deus cuncta quæ fecit, &
 erant ualde bona. Si cuncta quæ fecit Deus ualde bo
 na sunt, quomodo ergo omnia tranitas, & non solũ
 uanitas, sed etiam uanitas uanitatum? Sal. Cœlum
 & terra, maria & omnia quæ in hoc circulo cõtinen
 tur, per se q̃ bona sunt, quoniam a bono Deo creata
 sunt, sed comparata Deo, utiq; pro nihilo habenda
 sunt, quia semper Deus permanebit id quod est, illa
 uero omnia transibunt. Nam quæ uidentur, tempo
 ralia sunt, quia transitoria. Quæ autẽ non uidentur,
 æterna sunt. Ver. Quare bis replicauit sententiã
 suam, dicens: Vanitas uanitatum dixit Ecclesiastes;
 Vanitas uanitatum, & omnia uanitas? Sal. Ad ex
 aggerandam magnitudinem uanitatum iterauit sen
 tentiam suam, ut per hoc demonstraret, quia omnis
 gloria mũdi sicut flos foeni marcescet, & sicut fumus
 pertransibit. Ver. De quibus generationibus di
 cit, Generatio præterit, & generatio adueniet? Sal.
 De generatiõe Iudæorum, & generatione gentium.
 Recedit enim generatio prima Iudæorũ, quoniam

periit propter infidelitatem, & succedit ei generatio de gentibus, congregata uidelicet sancta fidelium Ecclesia, quæ per fidem Christi saluatur. Potest & sic intelligi, Generatio uade, & generatio ueni, id est, aliis morientibus, alii nascuntur, & quos prius uideras, iam non uides, & incipis uidere eos, qui ante non fuerint. Ver. Quare Salomon dicit, Terra in æternum stat, cum Dominus in Euangelio dicat, Coelū & terra transibunt. Sal. Vere iuxta Domini sententiam, coelum & terra transibunt, per meliorationem, sed non per ablationem, quia igne iudicii purgata, meliorabuntur, quoniam renouabuntur, sed penitus non destruentur. Tantum quippe ardebit coelum sursum, & terra deorsum, quantum malitia hominum simul & dæmonum coinquinari potuit. Ergo iuxta sententiam Salomonis, terra in æternum stabit, quoniam nunquam destruetur, ueruntamen renouabitur & meliorabitur. Ver. Quid significare uoluit Salomoni, cum ait, Oritur sol & occidit, & ad locum suum reuertitur, ibique renascens, girat per Meridiem, & flectitur ad Aquilonem? Quis enim nescit, quod oritur sol & occidit, & per incognitas nobis uias regreditur ad locum suum, unde certus est ut iterū oriatur. Sal. Hoc ideo Salomon dicit, ut ostenderet quia sol ipse, qui hominibus in lucem dici datus est, sua mutabilitate, id est, ortu suo & occasu, quotidie huius seculi monstraret interitū. Per
has nanq;

D. SALONII EXPLICATIO.

has namq; mutationes temporum, et per ortum syderum et occasum docet Salomon, quod humana ætas quotidie oritur & occidit. Ver. Quid sol in hoc loco spiritualiter significat? Sal. Illum uerum solem, Dominum uidelicet Iesum Christum, qui est sol iustitiæ, de quo dicit propheta: Vobis qui timetis Deum orietur sol iustitiæ. Iste sol iustitiæ quotidie oritur timentibus se, id est, fidelibus suis, uidelicet sanctis & piis hominibus. Occidit etiam Meridie pseudoprophetis, id est, hæreticis & malis catholicis, quia propter peccata sua lumen gratiæ ipsius amittunt. Occidit & infidelibus, quia luce fidei non merentur illustrari. Ver. Quid est quod ait, Omnia flumina currunt in mare, & mare non redundat, ad locum unde exeunt reuertuntur, ut iterum fluant? Quis enim nouit, quod ad locum suum flumina reuertantur, ut iterum fluant? Sal. Nouit Ecclesiastes ille, scilicet Salomon, per gratiã sancti spiritus. Sed iste noster Ecclesiastes, uidelicet Iesus Christus, qui est ipsarum aquarum conditor, per potentiam diuinitatis, quæ æqualis est Deo patri, plenissime nouit: quia flumina quæ in mare currunt, in abyssum defluunt, & per occultas uenas ad capita fontium reuertuntur, & de matre abyssu iterum ebullire incipiunt. Ver. Spiritualiter autem quid significat hæc flumina? Sal. Per hæc flumina designantur sancti prædicatores, qui cum uirtutibus emicant, doctrinis coru

IN ECCLESIAST. SALOMONIS

scant. Vere flumina sunt, quoniam aridam terram
 carnalium cordium sancta sua prædicatione simul et
 operatione irrigant, ut ferant bonorum operum fru-
 ctus. Ver. Quomodo ergo reuertuntur hæc flu-
 mina ad locū unde exeunt, ut iterum refluant? Sal.
 Quia sancti prædicatores in omni doctrina & opere
 quod faciunt, ad laudem sui creatoris recurrunt, ut
 Domino auctori suo laudes & gratias referant, per
 quem ut talia facerent, & omne bonum suum accepe-
 runt. Semper etenim ad fontem ueri luminis reuer-
 tūtur, ne forte arecant & exiccentur, ut ex eo aquam
 scientiæ, & gratiam uirtutū accipiant, ut iterum flu-
 ant, hoc est, & semetipsos bonis operibus repleant;
 & aliorum corda fluentis doctrinæ spiritualis infun-
 dant. Omnes etiam fideles flumina sunt, & hæc flu-
 mina ad locum unde exeunt, reuertuntur, quoniam
 per sancta desyderia ad amorem sui conditoris rede-
 unt, & de omnibus bonis laudes & gratias illi refe-
 runt, a quo ea perceperunt. Ver. Quare dedit Sa-
 lomon cor suum, hoc est, sollicito corde studuit, scire
 prudentiam atq; doctrinam, erroresq; & stultitiam.
 Bonum quippe est, scire prudentiā atq; doctrinam,
 quid autē boni est, scire errores atq; stultitiam? Sal.
 Sicut enim bonum est, scire prudentiam & doctri-
 nam, ita uere bonum est, errores scire & stultitiam.
 Quoniam prima sapientia est, carere stultitia, carere
 uero stultitia nemo potest, nisi qui intellexerit eam.

Similiter

D. SALONII EXPLICATIO.

Similiter nemo errores uitare potest, nisi qui intelligit eos, propterea in rebus terrenis plurima sunt noxia creata, ut dum ea uitamus, erudiamur ad sapientiam. Ver. Quare fuit æquale studium Salomoni scire prudentiam & doctrinam, & e contrario, errores & stultitiam? Sal. Vt dum appeteret alia, & ad alia declinaret, id est, apprehenderet bona, & deuiteret mala, uera eius probaretur sapiëntia. Ver. Quid est quod Salomon dicit, quia in multa sapientia multa sit indignatio: & quod addit scientiã, addit et laborem, quomodo multa est indignatio in multa sapientia? Sal. Ideo in multa sapientia multa est indignatio, quia quanto quisque maiorẽ sapientiam percipit, tanto amplius sibi indignatur, & dolet se uitiis & peccatis subiacere, & non habere uirtutes. Nam quanto quisque plus in sapiëntia proficit, tanto magis sibi irascitur de malis operibus quæ gessit, & contristatur & dolet super peccatis suis, & ideo qui addit sapientiam, addit et laborẽ, quia quanto amplius cœlestia & æterna cognoscit, tanto magis dolendo & flendo laborat, ut errorũ laqueos euadere possit, & liberari ualeat de huius seculi miseria. Ver. Quare dicit, Risum deputaui errorem, & gaudio dixi, cur frustra deciperis, cum hominum naturale sit ridere, & Dominus in Euangelio dicat: Gaudete & exultate, quoniã merces uestra magna est in cœlo? Sal. Nõ reprehendit Salomon risum naturalem, id est, mo-

destum & honestum, unde alibi dicit: Vir sapiens
 tacitus ridebit. Sed risum dissolutum & immodera-
 tum atq; perstrepentem appellat errorem, talis nem-
 pe risus uocatur cachinnus. Similiter non spirituale
 sed temporale gaudiū uocat deceptionem. Illi uero
 qui præterita mala sua nō plangunt, neq; intelligūt
 ruīnam peccatorum suorum, cachinnant et gaudent
 in rebus temporalibus, quia noua & breuia putan-
 tur esse bona perpetua, & idcirco suauitate præsentis
 uitæ decepti, quotidie huius seculi errore uexantur.
 Ver. Quid est quod ait, Vidi in omnibus uanitatē
 & afflictionem animi, & nihil permanere sub sole?
 Quomodo dicit nihil permanere sub sole, cum supe-
 rius dixerit, terra autem in æternum stat? Sal. Ni-
 hil em̄ permanebit sub sole, quod non transeat, quo-
 niam omnia uana sunt. Vnde in Euangelio ait Do-
 minus: Cælum et terra transibunt, attamen terra in
 æternum stabit, quia nō funditus destruetur, sed me-
 liorabitur, sicut dictum est superius. Ver. Quare
 dicit, Sapientis oculi in capite eius, stultus autem in
 tenebris ambulat? Nunquid oculi stulti non sunt in
 capite ipsius? Sal. Oculi in hoc loco non possunt
 corporales, sed spirituales intelligi, oculi uidelicet
 mentis, id est, sensus & intentiones animi. Per caput
 uero designatur Christus, unde Apostolus ait: Ca-
 put uiri Christus. Oculi uiri sapientis in capite sunt,
 quia uir sapiens omnem intentionem suam ad Chri-
 stum di-

D. SALONII EXPLICATIO.

stū dirigit, & in Christo collocat, & oculos suæ mentis semper ad cœlestia meditanda subleuat, stultus uero in tenebris ambulat, quia & stultitiæ simul, & peccatorum suorum tenebris obscuratur, & amore huius mundi obscuratur, odit enim cœlestia, et ideo nō potest sicut uir sapiens ad cœlum oculos suos erigere, quia nō cogitat ea quæ Dei sunt, sed quæ huius seculi. Ver. Quid ergo distat inter uirum sapientem & stultum? Sal. Hoc distat, quia iste sapientia & claritate illustratur & exornatur, ille uero errore stultitiæ suæ obtenebrat & deturbatur. Tantū quippe distat inter sapientem & stultum, quantum inter diem & noctem, lucem & tenebras. Ver. Quomodo tantū distat inter sapientem et stultum, cum unus sit interitus utriusq̃, sic enim moritur doctus ut indoctus, sapiens ut insapiens? Sal. Quāuis unus sit occasus, & similis mors sapientis & stulti, & sæpe in hac uita magis affligitur sapiens, q̃ stultus, tamen nō erit similis memoria in futuro, nec æqualem percipient remunerationem. Quoniam sapiens in die iudicii ad regni cœlestis eleuabitur gloriam, stultus uero demergetur in æternæ dānationis tormenta. Ver, Quis est ergo iste sapiens, qui tantum distat a stulto quantum lux a tenebris? Nunquid ille qui philosophicæ tantum disciplinæ pollet affluentia, uel liberalium artium splendet eloquentia? Sal. Nonnūq̃ secularis prudentia inimica Deo est, & carnalis sapi-

IN ECCLESIAST. SALOMONIS

entia, quamvis eloquentiæ floribus exornetur, nullum tamen in se spirituale, nullum perpetuæ beatitudinis fructum continet. Sed ille ueraciter est sapiens, qui Dominum diligit, qui eius mandata custodit, & quantum possibile est humane fragilitati, eius uoluntatem in omnibus studet implere, de quo paulo inferius dicit, Homini bono in conspectu suo dedit Deus sapientiā, & scientiam, & lætitiā. Ver. Quare statim subiungit, Peccatori autem dedit afflictionem & curam superfluam. Si enim Deus peccatori homini dedit curam & sollicitudinem superfluā habere, quid ergo ipse peccat, si curis superfluis atq; sollicitudine rerum temporalium affligitur. Sal. Causa superfluæ curæ atq; malæ sollicitudinis non est in Deo, sed in illo qui ante sponte sua peccauit, quia peccatis suis exigentibus promeruit, ut haberet curam superfluam & sollicitudinem, & ideo quod ait, Peccatori autem dedit curam superfluam, intelligendum est, suis meritis exigentibus, dari permisit, uidelicet quia peccator fuit. Ver. Quid uult demonstrare per hoc quod ait, Omnia tempus habent. Quod si omnia tempus habent, ergo æternæ diuinitatis substantia tempus habet. Sal. Absit, illa quippe ineffabilis & æterna maiestatis diuine essentia, quæ omnia creauit ex nihilo, non loco clauditur, non tempore coangustatur, non ullo spacio terminatur. Et idcirco Salomon, ut ostenderet de quibus hoc dixerit, statim sub

D. SALONII EXPLICATIO.

tim subiunxit, dicens, Et suis spaciis transeūt uniuersa sub cœlo. Vult enim demonstrare, q̃ contraria sibi sunt omnia, quæ in mundo sunt, et nihil est perpetuum ex omnibus quæ sub cœlo sunt, & ista tempus continent. Ver. De qua plantatione ait, de qua euulsione loquitur, cum dicit, Tempus plantandi, & tempus euellendi, quod plantatum est. Nūquid de plantatione aut euulsione arborum aut herbarum dicit? Sal. Nō, sed de natiuitate & morte hominū: nam quod superius dixit, Tempus nascendi, hoc est quod sequitur, & tempus plantandi, hoc est enim plantare quod nascitur. Quod supra dicit, tempus moriendi hoc est quod hic sequitur, tempus euellendi id quod plantatum est. Nam euelli hoc est, quod & mori. Soli quippe Deo notus est ortus & occasus hominum, id est, tempus nascendi, & tempus pereundi, & tēpus plantandi, & tempus euellendi. Quoniam ipse instituit, & tempus in quo unusquisq; nasceretur & plantaretur ad uitam, & tempus in quo moreretur, et de hac uita euelleretur, hoc est, per sententiam mortis eradicaretur. Ver. Quid est quod iterum dicit, Tempus occidendi & tempus sanandi? Nulli quippe dubium, quod tempus sanandi a Deo conceditur, sed nunquā Deus instituit tempus occidendi alium, aut eum quem semel occiderit homo poterit nunquam sanare? Sal. Non utiq; sed illi soli est tempus occidendi, & tempus sanandi, qui per

Moisen loquitur, dicens: Ego occidam & ego uiue-
 refaciam, percutiam & ego sanabo. Ipse nimirum sta-
 tuit tempus, in quo peccatores occidantur, & sanen-
 tur infirmi, hoc est, peccatis languidi. Tunc enim oc-
 cidit, cum uel corporis infirmitate, uel aliqua mundi
 huius aduersitate peccatores affligit, ut corrigantur
 & moriantur peccatis, & uiuant Deo. Sæpe namq[ue]
 Deus ideo flagellat sceleratos, ut eos occidat et sanet,
 id est, ut desinant esse quod sunt, et incipiant esse q[uo]-
 d non sunt. Est ergo tempus sanandi, cum Deus omni
 potens eos quos occidit, id est, aduersitatibus miseri-
 corditer affligit, per occultam inspirationē compun-
 git, & ad poenitentiam prouocat. Ver. De qua des-
 tructione uel edificatione loquitur, cum dicit, Tem-
 pus destruendi, & tempus edificandi. Nunquid de
 ædificatione ac destructione domor[um] loquitur? Quid
 enim nobis prodesset, si hoc diceret? Quis enim ne-
 scit quoniam alii destruunt, et alii ædificant domos?
 Sal. Non hic loquitur Salomon de domorum, sed
 de malorū destructione, & ædificatione bonorum,
 quoniā necesse est prius mala destruere, & sic bona
 postea ædificare, iuxta illud Psalmistæ: Declina a
 malo, & fac bonum. Hoc ergo dicit, quia tempus est
 destruendi mala, & tēpus est edificandi bona. Quo-
 niam in præsentī uita concessum est nobis tempus a
 Deo, ut destruamus mala, & edificemus bona, id est
 prius in nobis per poenitentiam deleamus peccata,
 postea

D. SALONII EXPLICATIO.

postea uero per sancta desyderia uirtutum construa-
mus ædificia . Ver. Quare dicit tempus flendi , &
tempus ridendi, tempus plangendi, & tēpus saltan-
di? Quis enim ignorat? quia alio tempore flemus,
alio autem ridemus, aut quid profuit dicere tempus
saltandi? Nunquid forsitan ostendere uoluit, quia
oportet nos saltationum exercere ludicra? Sal. Ab
sit, nihil oportet nos scurriliter agere, sed tēpus flen-
di est uita præsens, tempus ridendi uita futura . Qui
ergo in præsenti uita quotidianis fletibus & lachry-
mis se purgare studuerit, in uita futura ridebit, id est
gaudebit. Similiter tempus plangendi est uita præ-
sens: tempus saltandi est uita beata . In motu nanq̃
saltationis homo suæ mentis gaudium, & animi de-
monstrat affectum . Qui ergo in hac uita plangen-
do studet abolere peccata, in futura uita saltabit,
id est, lætabitur & exultabit in gloria æternæ foelici-
tatis. Ver. Quid est quod ait, Tempus spargendi
lapides, & tempus colligendi? Quid enim prodest
lapides spargere, aut quid prodest colligere, nisi for-
te domum aliquis uelit ædificare? Sal. Non de hac
caussa loquitur Salomon, sed de gentium dispersiōe
& collectione. Nam per lapides gentes designantur.
Vnde Iohannes. Potens est, inquit Deus, de lapidi-
bus istis suscitare filios Abraham. Tempus enim fuit
spargendi lapides ante aduentum Domini, quia gen-
tiles non permanserunt in unitate fidei, sed receden-

IN ECCLESIAST. SALOMONIS

tes a Deo dispersi sunt, quia uarios Deos adorabāt, & diuersa idola colebant. Tempus autem fuit colligendi lapides post aduentū Domini, quia sicut Apostolus dicit: Vbi uenerit plenitudo temporis, misit Deus filium suum, factum ex muliere, factum sub lege, ut eos qui sub legerant, redimeret, ut adoptionem filiorum reciperemus. Tūc quippe cœpit colligere lapides, quia peracto passionis ac resurrectionis suæ mysterio, direxit Apostolos suos in uniuersum terrarum orbem, dicens: Ite, docete omnes gentes, baptizantes eos in nomine patris & filii & spiritus sancti. Deinde celebrato quadragesimo die mysterio ascensionis in coelos, mox ut ab Apostolis fama nominis eius diffusa est longe lateq; per mundum, lapides, id est, gentiles, qui erant dispersi per uariam idolorum culturam, collecti sunt, quia resipiscences, & abominantes idola in unitatem fidei cōuenerunt.

Ver. Cur iterum dicit, Tempus dilectionis & tempus odii, tamen Iohannes Apostolus dicit: Qui odierit fratrem suum, homicida est. Et in Euangelio dictum est: Qui odit animam suam in hoc mundo, in uitam æternam custodit. Item: Qui nō odit patrem suum & matrem, fratres & sorores, uxorem & filios, ad huc autem et animam suam, non potest meus esse discipulus. Dic ergo quando tempus est dilectionis, & quando tempus odii? Sal. Et nūc quidem tempus est dilectionis, quoniam post Dominum dilige

re debe

D. SALONII EXPLICATIO.

re debemus patrem & matrem, uxorem & filios, & cæteros propinquos. Odii uero tempus, quia pro Christi confessione contemnere simul & odisse debemus & patrem & matrem, omnesq; propinquos, si nobis in uia Domini fuerint contrarii, sicut sancti martyres sæpe fecisse leguntur. Ver. Quid est quod rursum dicit, Tempus belli & tempus pacis? Quo modo tempus est belli? cum Dominus in Euangelio dicat: Esto consentiens aduersario tuo cito, dum es cum illo in uia. Et item: Si quis percusserit te in dextram maxillā tuā, præbe illi & alterā: & qui uoluerit auferre tunicam tuam, dimitte illi & pallium. Sal. Vere nobis semper est tempus belli & pugnae, quod in præsentī uita sumus, quoniam semper necesse nobis est pugnare aduersus insidias hostis antiqui, & æreas, id est, malignorum spirituum debellare potestates. Pacis uero tempus erit, cū de præsentī seculo migrauerimus, quoniam si bene pugnauerimus in hoc seculo, in futuro coronabimur, & in cœlesti Hierusalē eterna pace requiescemus. Ver. Quare dicit Cuncta fecit Deus bona in tempore suo, cum superius dixerit omnia uanitatē esse? Si omnia uana, quo modo ergo bona sunt? Sal. Omnia uana sunt, quia transitoria, uerū tamen cuncta bona sunt, quoniam a Deo bono creata, & bona quæ sunt, nō tamen semper, sed in tempore suo. Nam bonum est uigilare, bonum etiam est dormire, attamen semper uigilare,

IN ECCLESIAST. SALOMONIS

aut semper dormire nō est utiq; bonū. Ver. Quare dubitando loquitur Salomon, dicens: Quis nouit, si spiritus filiorum Adam ascendat sursum, et spiritus iumentorum descendat deorsum? Quis enim ignorat, quia spiritus iumentorum, id est, pecorum, cunctorumq; brutorum animalium simul cum corpore dissoluatur? Spiritus uero filiorum Adam, id est hominum, non simul cum corpore dissoluitur, sed mox ut egredietur de corpore, aut deducitur ad gloriam, aut demergitur in poenam. Sal. Paulo superius ostendit Salomon, quia quantū ad corporis uilitatem, nihil distat inter iumentum & hominem, quia sicut moritur iumentū, moritur & homo. Sed ut ostenderet, quia secundū animæ dignitatem multum distat homo a iumento & pecore, idcirco disiunxit, dicens: Quis nouit, si spiritus filiorum Adam ascendat sursum, & spiritus iumentorum descendat deorsum? Ostendit enim, quia hæc sola differentia est inter homines & bestias, quoniam hominis spiritus ascendit in cœlum, & spiritus iumenti seu pecoris descendit in terram, quia moritur & simul dissoluitur cum carne. Ver. Cur ergo dicit Salomon, quis nouit? quasi nemo sit, qui hoc cognoscere possit. Sal. Ideo ait, quis nouit? ut difficultatem rei demonstraret, nam quis in scripturis sacris non impossibilitatem, sed difficultatem aut raritatem significare solet, sicut est illud: Generationē autem eius quis enarra

enarrabit: hoc est, aut nullus, aut perrarus. Nani qđ impossibile est fieri, nullatenus potest, quis cum magno labore. Ergo ideo dicit, Quis nouit, quia perrarus, aut certe difficile inuenitur, ita spiritualis homo qui tunc perfecte comprehendere ualeat, cum de corpore spiritus egreditur, utrum ascendat, an ducatur ad poenam? Ver. Quid significant spiritualiter isti filii Adā, aut illa iumenta? Sal. Filii Adam significāt sanctos, & electos uiros, qui merito appellantur hoīes, quia rationaliter sancte & spiritualiter uiuūt, per iumenta uero designātur carnales, quia propter ea iumenta uocantur, quoniam bestialiter & carnaliter, sicut iumenta & pecora uiuunt. Hinc em̄ sanctus propheta Daniel dicit: Homines & iumēta sunt Domine. Solet enim fieri, ut illi qui uidentur homines iusti peccent & conuertantur a iustitia sua, & faciant iniquitatem. Econtrario illi qui sunt mali & impii, conuertantur ab iniquitate sua, & faciant iustitiā & æquitatem. Ideo dicit Salomon, quis nouit si spiritus filiorum Adam ascendat sursum, & spiritus iumentorū descendat deorsum, quia tam incertus est uitæ huius status, ut & peccator, qui iumentum uocatur, per poenitentiam cōuersus surgat, & ascendat in coelum, & iustus a iustitia sua ruat in peccatum, & demergatur ad inferos. Ver. Quid est quod ait, Stultus complicat manus suas, & comedit carnes suas? Quis est enim tam stultus, qui carnem suam co-

medat. Sal. Stultus iste, piger ille debet intelligi, de quo in Prouerbiis dicit: Abscondit piger manum suam sub ascella, nec ad os suum applicat eam. Iste piger & stultus complicat manus suas, & comedit carnes suas, quia magis eligit in ocio & torpore uiuere, & habere pugillum farris, q̃ laborando acquirere, unde pascatur. Comedit carnes suas, dictum est per hyperbolen. Ver. Quid est hyperbole. Sal. Hyperbole igitur dicitur, quando aliquid incredibile profert. Ver. Quomodo ergo dictū est hyperbolice, comedit carnes suas. Sal. Quia incredibile est ut homo comedat carnes suas. Sed ad exaggerandā pigritiā huius stulti ait, comedit carnes suas, ut ostenderet, quia magis stultus desyderat, ut caro eius tabescat inedia, & miseria famis deficiat, q̃ ut manuum suarum laboribus sustentetur. Ver. Quis est unus, de quo dicit Salomon, Vnus est, & secundum non habet, non filium, non fratrem, & tamen laborare non cessat, nec satiantur oculi eius diuitiis. Sal. Ille est, qui cum sit unus, id est, solus, non habet secundum, hoc est, filium, non fratrem aut aliquem propinquum, & nunquam cessat laborare, hoc est, diuitias congregare, nec tantas congregat, ut ei sufficiant. Et ideo maxima uanitas est, congregare diuitias & ignorare cui eas relinquat. Ver. Quem significat spiritualiter ille unus, qui non habet secundum. Sal. Dominū Iesum Christū, qui naturaliter solus est Dei

D. SALONII EXPLICATIO. 1

est Dei patris filius, & solus descendit de coelis ad redimendum genus humanum. Ver. Quomodo non habet filium uel fratrem, cum in sacro baptismo te omnes Christiani filii Dei efficiantur, & fratres Domini nostri Iesu Christi? Sal. Ille solus proprius & naturalis filius, cæteri uero omnes sunt adoptiui, & ideo fratres eius sunt non natura, sed gratia. Ver. Quomodo ergo iste unus laborare non cessat? Sal. Quia peccata nostra patienter sustinet, & misericorditer ad poenitentiam expectat, & pro nobis quotidie apud Deum patrem interpellat. Ver. Quomodo non satiantur oculi eius diuitiis? Sal. Quia nostram semper desyderat salutem. Ver. Quis est iste funiculus triplex, de quo dicit Salomon, Funiculus triplex difficile rumpitur? Sal. Vnitas patris et filii et spiritus sancti; quia in diuinitate tres sunt persone sed tantum una est natura. Ver. Cur ergo ait, difficile rumpitur? Illud enim quod difficile est, fieri potest, quamuis cum magno labore. Nūquid ergo potest iste funiculus rumpi? Sal. Vere nunquam, quia indiuidua est sanctæ Trinitatis natura, sed difficile in hoc loco pro impossibili accipiendum est, quia fieri non potest, ut diuinitatis scindatur natura. Ver. Quis est ille puer pauper & sapiens, de quo dicit Salomon, Melior puer pauper et sapiens, rege stulto et sene? Sal. Dominus Iesus Christus, qui puer dictus est propter innocentiam & simplicitatem, quia

peccatū non fecit, nec inuentus est dolus in ore eius. Iste puer cū esset diues, pro nostra salute factus est pauper. Iste ueraciter est sapiens, quia in ipso habitat omnis plenitudo diuinitatis corporaliter. Ver. Quis est ille rex senex et stultus? Sal. Diabolus qui pene ab ipso mundi exordio regnauit in genere humano, et ideo senex uocatur. Et uere stultus rex, quia quanto plures decipit, tanto sibi pcenā accumulat. In regno quippe huius regis senis & stulti, id est, diaboli, natus est puer optimus, Dominus uidelicet Iesus Christus, qui factus est rex regum, & Dominus dominantium. Ver. Quid est quod ait, Custodi pedem tuum, ingrediēs domum Dei. Nunquid ab offensione lapidum monet custodire pedē, quando ingredimur domum Dei, id est, Ecclesiam. Sal. Quamuis semper honeste & cum timore ac silentio debeamus ingredi domum Dei, tamen non pedem corporis docet custodiendum, sed pedem animæ, id est, gressum mentis, ut in conspectu Dei mundas preces effundamus, & est sensus. Quando ingrederis domum Dei, uidelicet Ecclesiam, custodi pedem tuum, id est, gressum mentis tuæ, ne offendas in malis cogitatioibus, ut oratio tua pura dirigatur ad Deum. Ver. Quid est quod ait, Ne dederis os tuum, ut peccare facias carnem tuam? Quomodo dat homo os suum, ut peccare faciat carnem suam? Sal. Quando loquitur uanitates et uerba libidinosa, qui
bus caro

D. SALONII EXPLICATIO.

bus caro incitetur ad peccandum. Sed iste est proprius huius loci sensus, Ne dederis os tuum, ut peccare facias carnem tuam, hoc est, noli quærere uanas excusationes, quibus des occasionem carni tuæ ad peccandum, hoc est, noli dicere, nō ego pecco, sed quod in me habitat peccatum, id est, fragilitas carnis meæ. Quia si hoc dicis, Dominum prouocas ad iram, quia si ipse sit author malitig atq; peccati. Ver. Quid est quod ait, Omnis labor hominis in ore eius, sed anima illius non implebitur? Quomodo potest fieri, ut omnia quæ laborat homo, sint in ore illius? Sal. Vir ecclesiasticus sapiens & doctus omnem laborem suum habet in ore suo, quia omnia quæ in scripturis sacris discit, quotidie meditatur, prædicat & docet, & anima illius non implebitur, quia non sufficit sibi quod didicit, sed magis ac magis semper discere cupit & studet. Ver. Quid est quod ait, Melius est uidere quod cupias, quam desyderare quod nescias? Quomodo uidet homo quod cupit? aut quomodo desyderat quod nescit? Sal. Ille qui oculis mentis discernit inter bonum & malum, uidet quod cupiat bonum, & quod repudiet malum. Qui autem sequitur uoluntatem cordis sui & concupiscentias, sæpe desyderat quod nescit, quia uult comprehendere qd non potest. Ver. De quo dicit Salomon, Qui futurus est, iam uocatum est nomen eius, & scitur qd homo sit? Sal. De Domino Iesu Christo, cuius no

IN ECCLESIAST. SALOMONIS

men ante uocatū est in scripturis sacris, quia ipse carnem de uirgine sumplerit, & cognitum est Prophetis & sanctis Dei, quod uerus homo erat uenturus. Ver. Si hoc de Domino Iesu Christo dictum est, quid est quod sequitur, Et non possit contra fortio- rem se in iudicio contendere? Quis est ille fortior, contra quem Dominus Iesus contendere non possit in iudicio? Sal. Deus pater, qui fortior est, quia filius secundum humanitatem minor est patre. Ver. Quid est quod ait, Melior est ira risu, cum risus naturalis sit, ira uero sit uitium? Sal. Ira non semper est uitium, sed aliquando est uirtus, quando irascimur nobisipsis, uel aliis peccantibus, hæc ergo ira melior est risu, quia risus dissoluit mentē, & læticia corrumpit hominis animum, hæc ira corrigit et emendat peccantem. Ver. Quid est quod ait, Calumnia cōturbat sapientem, et perdit robur cordis illius? Qui enim uere sapiens est, nulla turbatur calumnia, nulla delicitur aduersitate. Sal. Sapiens in hoc loco non intelligendus est ille, qui perfectus & consumatus in sapientia est, sed qui iam coepit habere sapientiam, & tamen adhuc non est perfectus. Talem sapientem calumnia hominū siue aduersitas aliqua facile cōturbat & perdit uigorem ac fortitudinem animæ illius, quia dum patienter nō sustinet aduersa, uexatur impatientia. Ver. Quid maledicere est, quia priores dies meliores fuerunt, q̄ isti qui modo sunt? Sal. Ideo

D. SALONII EXPLICATIO.

Ideo malū est hoc dicere, quia sicut ipse ait, stulta est talis interrogatio. Ver. Quare stulta interrogatio est, si quis dicat, Quæ causa est, quia priora tempora meliora fuerunt, quàm nunc sunt? Sal. Ideo stulta interrogatio est, quia unus Deus conditor est omnium temporū, cunctorumq; dierum. Ver. Quāvis enim unus sit Deus, conditor omnium temporum, cunctorumq; dierum, nunquid non fuerunt tempora bona & mala? Sal. Vere fuerunt, sed uirtutes faciunt nobis tempora bona, uitia & peccata faciunt tempora mala, & ideo nos ita semper bene uiuere debemus, ut dies præsentis nobis meliores sint, q̃ præteriti. Ver. Quid est quod ait Salomon Noli esse iustus multum, neq; plus sapias q̃ necesse est? Quid enim mali est, si multū homo iustus, aut quis potest plus sapere q̃ necesse sit? Sal. Ille multū & nimis iustus est, cuius iustitia sæua & crudelis, & alios excitat ad querelam & murmurationem, uerbi gratia. Qui uidet fratrem suum peccare, & magis uult eum condemnare atq; punire, q̃ per poenitentiam corrigere & emendare, ille nimis multum & nimis est iustus. Ver. Quomodo sapit homo plus q̃ necesse est? Sal. Quando superbe sapit, unde monet Apostolus: Noli altum sapere, id est, noli superbe sapere, sed time. Ille etiam plus sapit, q̃ necesse est, qui ea uult intelligere quæ non potest comprehendere, neq; penetrare. Ver. Quare Salomon dicit,

Qui timet Dominum, nihil negligit, cum Iacobus
 Apostolus dicat: In multis offendimus omnes. Nun
 quid Iacobus aut cæteri Apostoli non timebant De
 um? qui se in multis offendere confitebantur? Sal.
 Timebant utiq; & in multis offendeabant, quia non
 est homo super terram qui faciat bonum, & non pec
 cet. Ver. Quomodo ergo uerum est, quod dicit,
 Qui timet Dominū, nihil negligit? Sal. Qui enim
 sanctum & castum Dei timorē habet, nihil omnino
 negligit, quia neq; prosperis eleuatur, neq; aduersis
 deiicitur, quoniam quicquid illi accidit, nō eum con
 tristat. Ver. Quis est ergo ille, qui sanctum & ca
 stum Dei timorem habet? Sal. Qui Dominum in
 nullo uult offendere, & quantū ipse adiuuare digna
 tur, eius uoluntatem & mandata ipsius in omnibus
 uult & studet adimplere. Ver. Quid est quod ait,
 Sapientia confortabit sapientem super decem princi
 pes ciuitatis? Quæ est hæc sapientia, aut qui sunt isti
 principes? Sal. Sapientia in hoc loco Dominum
 Iesum Christum significat, qui est uirtus & sapientia
 Dei. Decem principes ciuitatis, sancti Angeli sunt
 intelligendi, qui sunt principes ciuitatis, id est, coele
 stis Hierusalem. Sunt & principes Ecclesiæ, quia ipsi
 quotidie regunt eam, & custodiunt. Ver. Cur er
 go decem dicuntur? Sal. Quia Decem fuerunt or
 dines Angelorum, sed unus cecidit per superbiam,
 & idcirco boni Angeli semper ad hoc laborāt, ut de
 hominibus

D. SALONII EXPLICATIO.

hominibus numerus adimpleat, et perueniat ad perfectum numerū, id est, denarium. Ver. Quomodo ergo sapientia confortat sapientem super decem principes ciuitatis? Sal. Quia maius est auxilium sapientiæ, id est, Domini Iesu Christi, q̄ sit Angelorum. Ver. Quid est quod Salomon dicit, Virum unum de mille reperi, mulierem autem ex omnibus non inueni? Nunquid non multæ mulieres sanctæ fuerunt, uirgines simul & uiduæ, quæ pudicitia ac castitate, ac bonis operibus Deo placuerunt? ex quibus plurimæ illarum martyrio coronatæ sunt? Sal. Vere fuerunt, & usque nunc sunt plurimæ uirgines ac uiduæ Deo acceptæ. Sed hoc dicit Salomon, quia suo tempore de multis uiris uix potuit inuenire bonū. De mulieribus uero nullam inuenit, quia omnes eum non ad uirtutem, sed ad luxuriā traxerunt. Ver. Potest hæc sententia spiritualiter intelligi? Sal. Vere potest, nam per uirum designatur bonus animi cogitatus, per mulierem uero, carnalis & dissoluta cogitatio. De mille ergo uiris uir unus inuenit, id est, unus cogitatus, mundus & purus, qui peruersa cogitatione nō turbet, id est, polluat extrinsecus. De mulieribus uero nulla inuenit, quæ placeat Deo, quia carnalis & peruersa cogitatio non est accepta Deo. Ver. Quid est quod ait, Qui custodit præceptum Dei, non experietur quicquam mali? Quomodo nihil mali experietur, qui præce-

pta Dei custodit: cum sancti uiri qui praecepta Dei custodierunt, multa mala perpeffi sint in hoc seculo: Sal. Verum est, quia qui praecepta Dei custodit, id est, omne quod iussit & praecepit Deus, non experietur quicquā mali in futuro, hoc est, nullum malum patietur, nullū malum sustinebit in die iudicii. Quāuis enim aliqua mala patiat in hac uita, leuia sunt & transitoria, in futura uita nihil mali patietur, qui perueniet ad aeternae beatitudinis gloriam. Ver. Quid est quod ait, Melior est canis uiuus leone mortuo: quid per canem uiuum aut leonem mortuum Salomon uult intelligi? Sal. Canis uiuus significat populum gentium, Leo mortuus populum Iudaeorum, a Deo derelictū. Melior est ergo apud Deum canis iste uiuus, q̄ leo ille mortuus, quia nos qui de gente credimus uiuentes, per fidē cognoscimus Deū patrem, & filium, & spiritum sanctum. Aliter, canis uiuus est peccator, qui se peccatis mortuum confiteatur, & per poenitentiam resurgens, incipit per iustitiam uiuere. Leo mortuus, est iustus, qui in sua iusticia confidit, & de meritis suis gloriatur, & idcirco superbia elatus mortuus est apud Deum. Melior est ergo peccator humilis, & per poenitentiam correptus, q̄ iustus superbus, quia ille abominabilis, iste Deo acceptus est. Ver. Quid est quod dicit, Omni tempore sint uestimenta tua candida, & oleum de capite tuo non deficiat: Nunquid potest aliquis candida uestimen

D. SALONII EXPLICATIO.

uestimenta semper habere? Et si forsitan ita est diues
ut semper uestimenta candida possit habere, quod
omnino difficile est, quomodo fieri potest, ut de ca-
pite ipsius nunquā deficiat oleum? Quis nanq; fer-
re potest, ut semper habeat caput oleo perunctum?
Sal. Hæc sententia non historialiter, sed spirituali-
ter debet intelligi. Nam per uestimenta uirtutes de-
signantur, quibus anima uestitur et ornatur. Per ole-
um uero designatur opus misericordiæ, id est, elee-
mosyna, uel certe spiritualis lætitia, & est sensus, Om-
ni tempore sint uestimenta tua candida, id est, quæ-
cunq; bona egeris, sint munda & pura, ut possint
Deo esse accepta, & nunquam deficias ab operibus
misericordiæ, & semper habere stude spiritualement
læticiam. Ver. Quæ sunt muscæ, de quibus Salomō
dicit: Muscæ morientes exterminant suauitatem illi-
us. Sal. Veruntamen Salomon spirituales muscas
intelligit. Ver. Quæ sunt illæ spirituales muscæ?
Sal. Dæmones, uitia & peccata, hæc enim omnia ex-
terminant hic suauitatem unguenti, id est, gratiam
sancti spiritus. Ver. Quid est quod ait, Cor sapien-
tis in dextera eius, et cor stulti in sinistra illius? Quis
enim habet cor suum carnale in dextera uel in sinistra
manu? Sal. Vere nullus, & ideo hæc sententia spi-
ritualiter debet intelligi. Ver. Quomodo spiritua-
liter debet intelligi? Sal. Per cor designatur inten-
tio seu cogitatio, Per dextram manū, opus bonum,

IN ECCLESIAST. SALOMONIS

per sinistram uero malum. Cor igitur sapientis in dextra eius, quia intentio & cogitatio uiri sapientis ad hoc tendit, & ad hoc laborat, ut semper bona operetur. Quatenus in die iudicii ad dexteram Domini, id est, in sorte iustorum stare mereatur, & cum ipsis in æterna beatitudine gloriari. Cor uero stulti in sinistra illius, quia & mala quæ cogitat, & malis operibus accumulatur, pro quibus in die iudicii a sinistris, id est, in sorte reproborum ponetur, & cum eis in æternum punietur. Ver. Quis est ille spiritus, de quo dicit, Si spiritus potestatem habentis ascenderit super te, locum tuum ne dimiseris? Quis est iste, qui habet potestatem, cuius spiritus si ascenderit super nos, locum nostrum dimittere non debemus? Sal. Diabolus princeps huius mundi, spiritus eius est maligna suggestio. Ver. Spiritus Diaboli quomodo ascendit super nos? Sal. Quia persuadendo facit ut mala cogitemus, si ergo suggerente diabolo, mala cogitatio ascenderit in cor nostrum, non ei locum dare debemus, sed contra ipsam fortiter pugnare, ne forte opere cōpleamus malam cogitationem. Potest & sic intelligi, si habes in te humilitatem, munditiam, castitatem, patientiam, charitatem, & Diabolus suggerit tibi superbiam, libidinem, immunditiam, iram, odium, ne dimiseris locum tuum, id est, ne dimittas humilitatem & efficiaris superbus. Sic & de cæteris est intelligendum. Ver. Quare dicit Salomon?

D. SALONII EXPLICATIO.

mon? Væ tibi terra, cuius rex iuuenis est, & cuius principes mane comedunt? Nunquid nō beata fuit terra Israhel, quæ iuuenem habuit regem, Dauid scilicet, qui fuit triginta annorum, quando suscepit regnum? Nunquid non bonus rex Iosias, qui regnare coepit in adolescentia? Sal. Vere bonus rex Dauid bonus & Iosias? Sed uæ terræ, cuius rex iuuenis est, hoc est, in quo parua & infirma est sapientia, & carnalis prudētia, qui iuuenilia desyderia sequitur, odit iusticiam, ueritatem, & iudiciū. Ver. Quomodo principes mane comedunt? Sal. Principes mane comedunt, quando luxuriosam uitam ducunt, & idcirco uæ terræ, cuius principes mane comedunt, quia magis amant huius seculi uoluptates, & carnis delectationes, q̄ populi salutem, ideoq; luxuriose uiuendo peruertunt iudiciū. Ver. Quomodo beata est terra, cuius rex est nobilis, & cuius principes comedunt in tempore suo? Sal. Si rex nobilis est, hoc est, decorus sapientia, splendidus iusticia, ornatus bonis moribus & actibus, uere beata est terra cui præest, quia regit eam in iudicio & æquitate, & exaltat iustitia. Ver. Qui sunt illi principes, qui in tempore suo comedunt? Sal. Illi nimirum, qui non luxuriantur; qui non amant huius seculi uoluptates, qui non uiuūt in crapula & ebrietate, sed cibos quærunr tantum ad corporis sustentationem. Ideoq; beata terra, quæ tales habet principes, quia dum iusticiam & æquitatem diligunt, utiq; non peruertunt iu-

dicium. Ver. Quid est quod ait, Da partes septem necnō & octo? Quæ sunt illæ septem partes uel octo quas dare nos iubet? Sal. Per septenarium numerum uetus testamentū propter sabbathum, qui est septimus dies sanctificatus in lege, per octonarium uero designatur nouum testamentum propter diem dominicam, qui est octauus, Domini Christi resurrectione sanctus. Ver. Quomodo ergo intelligendum est quod ait, Da partes septem, necnō & octo? Sal. Hoc modo, id est, utrūq; testamentum, uetus scilicet & nouum, pari ueneratione credendo suscipe, & præcepta eorum diligenter implere stude. Ver. Quid est quod ait, Si ceciderit lignum ad Austrum, aut ad Aquilonem, in quocunq; loco ceciderit, ibi erit? Nunquid quod cadit lignum ad Aquilonem, aut ad Meridiem, non sæpe mouetur in alias mundi partes? Sal. Nulli hoc dubium est, sed hæc sententia spiritualiter intelligi debet. Nam per lignum homo designatur, quoniam unusquisq; est quasi lignū syluæ generis humani. Per Austrum, qui est calidus uentus, designatur requies paradisi. Per Aquilonē, qui est frigidus, designatur inferni supplicium. Et est sensus. Vbi cūq; sibi homo locum ad futuram sedem præparauerit, ibi erit cum mortuus fuerit, hoc est, si bene sibi locum uiuendo præparauerit ad Austrum cum ceciderit, id est, mortuus fuerit, in requie paradisi & gloria regni coelestis permanebit in æternū. Si uero male uiuendo sibi locum præparauerit ad Bo-

ream,

D. SALONII EXPLICATIO.

ream, inferni pœnas luet in secula seculorum. Ver.
 Quid est quod ait, Qui obseruat uentū, nō seminat,
 & qui considerat nubes, nunquā metit? Quis em̃
 est tam stultus, qui semper obseruet uentum, ut non
 seminet, & semper consideret nubes, ut nunquam
 metat? Sal. Hæc sententia spiritualiter intelligenda
 est. Nam per uentum & nubes sæpe tempestas gene-
 rari solet, per uentum ergo designatur diabolus, per
 nubes præsentis seculi aduersitates. Quicumq; igitur
 timet diaboli persecutionē, aut mundi huius aduer-
 sitates, non seminat, id est, uerbum Dei non prædi-
 cat, nec operatur bona quæ ualeat. Etiam nunquam
 metet, quia etsi aliqua bona inchoat, ad perfectionē
 non ea perducit. Ver. Quid ergo agendum est?
 Sal. Sine consideratione nubium, & timore uento-
 rum, in mediis tempestatibus seminare debemus, id
 est, in omnibus aduersitatibus uerbum Dei prædi-
 care, et bona opera quæ ualemus, agere semper opor-
 tet. Ver. Quid est, Mane semina semen tuum, &
 uesperī ne cesset manus tua? Quis enim semper, &
 mane & uesperī seminare potest, maxime cum glacia-
 li tempore nullus audeat seminare? Sal. Semen hoc
 loco non intelligendum est frumenti, uel alterius cu-
 iuslibet grani, sed semen boni operis, ex quo nasci-
 tur fructus iusticiæ, & merces æternæ remuneratio-
 nis. Ver. Quid ergo docet cum dicit, Mane semi-
 na semen tuum, & uesperī ne cesset manus tua? Sal.
 Ut nullo tempore, nulla etate a bonis operibus cesse

IN ECCLESIAST. SALOMONIS

mus, & nostram matutinam iusticiam uesper inueniat, & uespertinam misericordiam iterum sol ortus accumulet. In adolescentia pariter & senectute uirtutū copia nos semper Deo commendet. Mane ergo semina sementium, & uespere ne cessat manus tua, hoc est, semper te in bonis operibus exerce. Ver. Quid est quod ait, Et florebit amygdalus, impinguabitur locusta, & dissipabitur capparitis? Quid enim profuit hoc dicere, cum nullus ignoret, quia & amygdalus florere solet, impinguari locusta, & dissipari capparitis? Sal. Hæc sententia spiritualiter est intelligenda, & magnum in se continet mysterium. Nam per amygdalū designatur Dominus Iesus Christus, quia sicut nux amygdali constat ex corio, osse, & nucleo, ita Christus ex carne, anima, et diuinitate. Quoniam per os amygdali diuinitas designatur. Ver. Per locustam & capparim quid significatur? Sal. Per locustam, populus gentilis: per capparim populus Iudaicus. Ver. Quomodo ergo intelligenda est hæc sententia? Sal. Florebit amygdalus, id est, nascetur Christus, & coruscabit miraculis. Impinguabitur locusta, id est, credet gentilis populus, et replebitur donis spiritualibus. Dissipabitur capparitis, hoc est, peribit ppter infidelitatem populus Iudaicus. Ver. Quare uerba sapientium stimulis & clauis assimilantur? Sic enim dicit Salomon, Verba sapientū sicut stimuli, & quasi clauis in altum defixi. Sal. Aptissime uerba sapientum clauis & stimulis comparantur.

D. SALONII EXPLICATIO.

tur, quia peccatorū culpas nesciunt palpare, sed pun-
gere, qui enim ueraciter sunt sapientes, eorum pro-
culdubio uerba clari sunt & stimuli, quia peccatores
non blandimentis fouent, sed aspera increpatione re-
darguunt, & eorum secretas conscientias quasi pun-
gendo ad dolorem & lamenta, execrant, ut corrigan-
tur. Ver. Quid est quod ait, Quæ per magistrorū
consilium data sunt a pastore uno? Qui sunt illi ma-
gistri, per quorum consilium data sunt sapientium
uerba, aut quis est unus ille pastor, a quo data sunt?
Sal. Magistri sunt sancti Prophetæ & Apostoli.
Pastor unus est Deus, a quo data sunt omnia uerba
sapientium, quia ipse docuit magistros, id est, Pro-
phetas & Apostolos, & reſtruxit eorum consilium,
quoniam ipse dedit uerba in corde & ore ipsorum.
Ver. Quid est qđ Ecclesiastes in fine libri sui dicit,
Deum time, & mandata eius custodi, hoc est em̄ om-
nis homo? Quomodo fieri potest, ut hoc tantum sit
homo, id est, timere Deum, & mandata eius obser-
uare? Multo quippe maior est pars eorum hominū
qui nectiment & custodiūt. Sal. Vere maior pars
est malorum, q̄ bonorum, quia sicut Dominus dicit
Multi sunt uocati, pauci uero electi. Et incomparabi-
liter maior infidelium multitudo, q̄ fidelium. Ver.
Quid ergo uult in hoc loco Salomon demonstrare?
Sal. Hoc namq; demonstrat in his uerbis, quia non
est homo, qui Deum non timet, & mandata eius nō
custodit. Ver. Quare non est homo? Sal. Quia

IN ECCLESIAST. SALOMONIS

non custodit modū rationemq; suæ naturæ. Ver.
 Quæ est ratio & modus naturæ humanæ? Sal. Ra-
 tionabiliter uiuere, quia inter animantia omnia solus
 homo creatus est rationale animal, quoniā inter cun-
 ctā terræ animantia solus homo accepit a Deo rationē
 & intellectum, ita ut agnosceret suū creatorē, & dili-
 geret eum, ac timeret, & corde & ore simul laudaret.
 Ver. Quid est Deum timere? Sal. Voluntatem
 eius implere, & bona quæ faciēda sunt facere. Ver.
 Si ergo qui nō timet Deū, & mandata eius nō custo-
 dit, non est homo, quid ergo est? Sal. Bestia est.
 Ver. Quomodo bestia est, cum in eo uideatur hu-
 mana substantia & persona? Sal. Quāuis em̄ uide-
 tur habere humanā substantiā & personam, tamen
 quia nō rationabiliter, sed bestialiter uiuit, non ho-
 mo, sed bestia dicendus est. Ver. Quomodo be-
 stia uocatur? Sal. Si est crudelis suis domesticis &
 subiectis, aut uicinis, leo est, nō homo: si aut raptor
 est Tigris uel lupus: si uero est adulter aut fornica-
 tor, aut immūds, canis est aut porcus: aut si est stul-
 tus, asino comparatur: fraudulentus itaq; aut simu-
 lator, congrue uulpeculæ assimulatur, sic de cæteris
 intelligendum est. Ver. Quis est ergo uera-
 citer homo? Sal. Ille qui Deum timet,
 & mandata eius custodit.

Finis Ecclesiastis.



BESSARIONIS

EPISCOPI TVSCVLANI, CAR
dinalis Nicæni, & Patriarchę Constantino
politani, de ea parte Euangelii Iohannis,
ubi scribitur, *ἐὰν ἀποθῇς ἅλω μένειν ἵως ἔρχεται τὸ*
κρῖνος; Id est, Si cum uolo manere do

necueniam, quid ad te? erudi
ta, & ualde quàm utilis
disceptatio:

Hæc peruersis quibusdam Monachis, aut si qui sunt alii quo
uis monacho indoctiores, accurate legenda simul & explo
randa sunt, ut intelligant tandem, q̃ turpi iudicio, ne dicam
morbo, utantur, ubi de translationibus Latinis iudicant, Græcæ
linguæ non tantum ignari, uerum etiam ex professo iuratissimi ho
mines, Sed quid ærem uerberos? Quasi uero pullatus ille circulus
non semper inscitam illam scientiam amarit, aut non
ubiq; præpostere senserit, & quod est impu
dentius, nusquam non etiam illa, quæ
neq; legerat, neq; intellexerat,
damnauerit.



REVERENDO

AC ERVDITO PATRI, D. VLDE
richo Fabro, Coenobii Dominici Sepul
chri in Denckendorff Præposito Di
gnissimo, Domino & patrono suo
bene de se merito, Iohannes
Alexander Brassicanus
Iureconsultus
S. D. P.



IDEO QVOSDAM IN
eam opinionem, & illam
quidem mire peruersam,
adductos esse, Præsul or-
natissime, ut infœlicissimū
tot sectarum atq; doctrina
rum prouentū, quibus
inter se minus, q̃ horolo-
giis conuenit, iam non in
angulis tantum, qui *ἡμετέριον* mos est, sed propa-
lam & publice pro suggestu Græcis literis imputent.
Qua re quid uel indigni cogitari, uel ineptius etiā
dici possit, quis ex iis, qui uel mediocriter eruditi
sunt, non intelligit? Sic & terræ matr̃s beneficia, si
Diis placet, acculemus. Sicelementa damnemus, sic
deniq; & alia, ut ille inquit, *ὅσα ἐξικοντα ἄλλα*, in ius
rapiamus, quæ omnia & inculpata, et nostris usibus
ubiq; seruientia, nos ipsi qui abutimur, deteriora &
merito

merito reprehendenda efficitur. Quoniā autem,
Vlriche præstantis. cum superioribus diebus in cœ
nobio tuo tecum essem, de eadem illa re, quæ tua est
egregia eruditio cum summa modestia coniuncta, &
exquisita suauitate uerborum, & acerrimo cum iudi
cio dissertabas, arbitratus sum me non uulgare ope
ræprecium esse facturum, si simul & tui demerendi
studio, & illius præposteræ opinionis confutandæ
caussa, D. Bessarionis Cardinalis Doctissimi Com
mentariolū in hoc argumenti genere doctissimum,
ad te mitterē. Nam ex illo, quod alias te cōprobasse
certo scio, liquido intelligis, quis usus sit Græcarum
literarum, præsertim in libris sacris, quæ necessitas
quæ dignitas, & quæ tandem illarum ratio habenda
sit. Quando qui hoc præsidio carent, fieri nō potest,
ut non pueriliter hallucinentur, ut non grauitè im
pingant, ut non omnium maximo malo cæcutiant.
Deprehendes etiam, quodnam scælicioris interpre
tis officium, quæ cura, quæ diligentia esse debeat, q̃
nō temere de translationibus iudicandū sit. Id quod
hac ætate peculiare uitium est, interpretem uidelicet
in huius linguæ uersione damnare, in qua uix ultra
alphabetū progressus fueris. Cuius rei uel unus ille
sedentarius Sutor, quum contra Erasmi scriberet,
pulcherrimū specimen dedit. Insunt præterea & alia
huiuslibello lectu dignissima, & huic seculo quasi na
ta, quem tu, ueluti perpetuo consueuisti, eo animo
accipē, quo nos tibi dedicauimus. Sic certe significa

tionem aliquam dare uolui, ut qui nihil non tibi debeo, uel aliquam mediocrem portionem persoluisse uidear, donec ex omni parte soluendo esse possim. Vale Præposite optime, ac amice charissime. Vienne Austriæ, Anno a nato Iesu M. D. XXXII. Mensis Ianuarii die III.

Si uolo eum manere, donec ueniam
quid ad te?

Iohannis
ultimo,

Si, non Sic

Dormitan
tes librarii.

Facilis ad
errorem
lapsus.

Contradi
centes.

CUm nuper sacrum Euangeliū Iohannis Euangelistæ in eius festiuitate Latine legeretur, uenitumq; esset ad eam partē, ubi Petrus a Salvatore de Iohanne quærēs: Domine, inquit, hic autem quid? & Dominus respondit iuxta Græcæ quidem literæ ueritatem; Si eum uolo manere donec ueniam, quid ad te? Iuxta Latinam uero interpretationē: Sic eum uolo manere donec ueniam, quid ad te? Quæsiuit a me quidam, an recte interpretes eam particulam in Latinū uerissem? cui ego: Recte quidem ab initio translata fuisse arbitror, & Si, nō Sic, ab interprete scriptum extitisse. Sed postea (quod accidere frequenter solet) uitio dormitantis Librarii, Si, coniunctionem in aduerbium, Sic, fuisse conuersam, una litera addita. Facilis est enim ad errorem lapsus, quoties dictio aliquid significans, in dictionē aliud significantem, una duntaxat addita uel detracta litera, commutari potest. Tum alii quidam ex his qui aderant, contradicere mihi cœperunt, non Si, sed Sic legi debere, assue

asseuerantes, beneq; se habere Latinum sermonem
dicentes, & aut rectiorem esse Græco, aut illo non
minus rectum, quandoquidem siue Si, siue Sic dica
tur, eadem sit utriusq; sententia. Quod uero rectius
se haberet sermo Latinus, minime ausi sunt prose
qui, stulte id a se dictum intelligentes, & contentio
ris potius gratia, q̃ ueritatis. Siquidem Euangelista
Iohannes & Euangelium suum Græco, non Latino
sermone composuit, & ⁱⁿ cōiunctione usus est, quæ
in Latinū uersa, Si absq; ulla ambiguitate significat.
Interpres uero, quicumq; is quidem fuerit, nec tanta
spiritus gratia, quanta Iohannes illustratus fuisse exi
stimandus est. Et uerbo usus est ad errorē prodiuo,
quippe addita Si coniūctioni, per ignorantiam siue
incuriā Librariorū, C litera, omnis sententia subuer
titur, & pro coniunctione, quæ dubia est, aduerbiū
efficitur adfirmandi. Quod uero eque bene Latinus
sermo se habeat, argumentis quibusdam conati sunt
ostendere, quæ breuiter hoc loco referenda existima
uimus, & ad ea quantum diuinus fauor concesserit,
respondendum. Primo enim id autoritate Hiero
nymi & Augustini, & aliorum Latinorū doctorum
confirmant, quos eo in loco non Si, sed Sic scripsisse
& ita eam partem exposuisse constat. Hos enim non
est uerisimile, & ueritatem latuisse, qui & sapientio
res nobis fuere, & nō modo Latinæ, sed etiam Græ
cæ linguæ doctiores, quando præsertim ante ipsorū
quoq; ætatem nō Si, sed Sic apud Latinos scriptum

Contradi
centum ar
gumenta,

fuisse animaduertitur. Post hæc asserunt, nihil in sacra scriptura innouandum esse, præcipueq; in Euangelio, ubi uel unum apicem, aut unum iota immutare nefas est. Daretur enim hoc modo facultas uolentibus sacram scripturam corrumpere, quod nullo modo est permittendum. Cum igitur apud Latinos Euangelium sic habeat, asseri aliter, mutariue sine crimine non posse. Præterea Si cōiunctionem, inquiunt, aliquando affirmatiue, nōnunquam uero & dubitatiue accipi, & cum præsentī uel præterito indicatiuo adiungit, quæ tempora certiora sunt, & quasi determinatā rem notamq; significant, affirmatiue capi, cum uero subiunctiuo adnectitur, dubitatiue. Quod si futuro iungatur, tunc propter incertitudinem sui, nec cum indicatiuo omnino affirmare, nec cum subiunctiuo prorsus esse ancipitem. Præsentī uero etiam subiunctiuo adiunctam, certitudinem significare. Hanc eorum sententiam quibusdam Virgilii ac Ciceronis exemplis nituntur affirmare. Cum igitur apud Græcos ita scriptum sit, εἰ θέλω, hoc est, Si uelim, procul dubio certitudinem utrobique significari asserunt. Ideoq; seu, Si uelim, ut Græci, siue Sic uolo, ut Latini dicamus, unam prorsus & eandem esse sententiam. Postremo ubi negatio, inquiunt, uel ambiguitas locum non habet, indicatiuo cum Si cōiunctione utendum est. In hoc uero, de quo loquimur Euangelii loco, nulla habet locum ambiguitas. Indicatiuo igitur adiungenda illa coniunctio, &, Si uolo dicendum, quod

quod idem est, ac si diceretur, Sic uolo. Idcirco, Sic uolo, in Euangelio legendum. Quod uero hæc duo idem significant, huiusmodi confirmant exemplo. Si quis enim, inquit, alicui in die Veneris carnes edenti ita dixerit, Tu ne die Veneris carnes edis? & ille ita respondeat, Si edo, quid ad te? Profecto si edo idem est ac si diceretur, Sic edo, uel ita edo, quid ad te? quemadmodum igitur, Si edo, & Sic edo unum sunt, ita etiã Si uolo, & Sic uolo idem esse fatendum censent. Quod si quis caussam flagitet, cur Euangelista dixerit, Et non dixit Iesus quod non moritur, sed Si eum uolo manere, nihil eũ dicere asserunt. Primo enim non uim & sensum uerborum, sed uerba ipsa ab Euangelista negari, deinde & sic uolo significare sic uelle eum manere, sed uoluissẽ Christũ reprehendere Petrum, ueluti quæritabundum de his, quæ ad se minime pertinerent. Concludunt ergo iniuriam fieri Euangelio, si quis hunc locum mutet, moriendumq; potius esse, q̃ tale aliquid tentandum, nec debere quenquam catholicum putari, qui mutandam hanc Euangelii authoritatẽ existimet, censendumq; eum qui id ausus fuerit, etiam peiora facturum, addita ei authoritate atq; potentia, hæc quidem illi. Nos uero ad ea hunc in modum respondemus. Oportet enim qui aliquid ex una in aliam transfert linguam, & linguam ipsam nosse, quam transfert, & eius non modo sententię ueritatem, sed etiam uerba de uerbis exprimere, idq; p̃sertim in sacris literis, ubi nõ mo

Responso
ad argumẽ
ta cõtra sen
tentium.
Officium
boni inter
pretis.

Hierony-
mus.

Ordo my-
steriorum
est.

Iohannes
mortuus.

Augusti-
nus super
Iohannē.
Chryso-
stomus.

do uerba ipsa custodiri, sed ordo quoq; uerborum, quoad eius fieri potest, seruari debet. Siquidem in sacra scriptura etiam ordo ipse uerborum, ut Hieronymus ad Pammachium scribens, inquit, mysterium est, periculosum est em̄ aliquid in ea mutare, nisi proprietates linguæ, in quam fit translatio, tantā interim obseruantiam non patiatur, tunc enim licet diuersorum uerborum ambitu eandem fideliter repræsentare sententiam, sed hoc in præsentia locum nō habet. Cum hæc ita sint, illud quoq; animaduertere conuenit, quod licet nonnullorum opinio fuerit, Beatū Iohannem Euangelistam nōdum uita functum esse, sed secundum Christi aduentum uiuendo prætolari. Vera tamen sanctorum doctorum sententia est, mortuum eum esse, non tamen per martyrium, nec infirmitate primo maceratum, uel mortis dolore & angustia oppressum, sed sua sponte dum sanus esset, ad sepulchrum eius iussione per discipulos fossū descendisse, iacuisse, spiritum creatori reddidisse, & ad patres appositum fuisse. Legant qui uolunt Hieronymum in Prologis, tum eius, de quo loquimur Euangelii Iohannis, tum libri Apocalypsis, cuius ea sunt uerba, quæ modo retulimus. Legant Augustinus super Iohannē, ubi de hac quæstione agitur. Legant Chrysostomum in multis locis, cæterosq; plurimos, & cum tot tantisq; doctoribus idem ipsi quoq; sentiāt (ut fas est.) Nam & si aliqui ex recentioribus aliter senserint, nonnulli tamen ex eis, & ii quidem

quidem inter illos doctiores habiti, illis aperte con-
tradiciunt, eorum quos diximus doctorum sententi-
am probantes, & quantum in eis est, de nouo excogi-
tatis rationibus corroborantes, adeo ut hæc sancto-
rum de morte Iohannis opinio aut necessaria sit, &
omni dubitatione carens, aut si dubia sit, apud pau-
cissimos sit dubia, quod & pium non sit dubitare.
Tamen ut disputationis gratia in præsentia conceda-
tur, illud certe manifestum est, mortuum esse Iohan-
nem, plus certi habere quàm ambigui: uiuere uero,
certi nihil, sed ambigui plurimum, cum nullus ex
priscais patribus, sanctisq; doctoribus id affirmet.
Neminem præterea latere debet, sacros libros uete-
ris nouiq; testamenti ab ipsis Ecclesiæ nascentis exor-
diis apud Latinos tum ex Hebræo ut ueteres, tum e
Græco, ut & nouos & ueteres per septuaginta inter-
pretes editos fuisse longo ante Hieronymum tempo-
re, trecentis scilicet & amplius annis, qua ædificatione
sancta Latina Ecclesia tunc utebatur, eamq; ueteres
sanctissimi doctores, Cyprianus, Hilarius, Augusti-
nus Hieronymo cogitantes, imo uero illo sene, ipse
iuuenis, exposuere. Multos præterea fuisse sacrarum
literarum e Græco in Latinum interpretes, testatur
Augustinus in iij. de Doctrina Christiana libro, ita
inquiens: Qui enim scripturam ex Hebræa in Lati-
nam uerterunt linguã, numerari possunt, qui autem
e Græca interpretati sunt, nullo modo. Hanc tantũ
scripturam multo post tempore superueniẽs Hiero-

Augusti-
nus de Do-
ctrina Chri-
stiana.

Hierony
mi transla
tio.

nymus, egregius doctor, denuo ueterē ex Hebræo, nouam e Græco fonte traduxit, qua in re etsi multis præbuit latrandi cōtra se causam, multa tamen aliter q̄ ædita a prioribus fuerant, dictauit, & ut ipse dicit, emendauit atq; correxit, nec cæteras solū scripturæ partes, sed ipsa quoq; Euangelia. Hæc eī sunt eius uerba aduersus detractores suos, q̄ modo retulim⁹. Ita tamen probata ab om̄ibus eius translatio fuit, ut antiqua, uel ut uerius dicam, tot antiquis interpreta tionibus oblitteratis, Hieronymiana duntaxat tradu ctione catholica utatur Ecclesia. Legat qui uult eius ad Pammachium de optimo genere interpretandi Epistolas, ad Marcellum contra detractores suos, ad B. Augustinum q̄ plurimas eius defensiones, & ita esse intelliget. Quid uero ad Damasum Pontifi cem Rom. in præfationem super Matthæū scribat, si libet uideamus. Nouum, inquit, opus me facere cogis ex ueteri, & post exemplaria scripturarū toto orbe diffusa, quasi quidam arbiter sedeam, et quia in ter se uariant, quæ sunt illa quæ cum Græca consenti ant, ueritate discernam. Equibus omnibus luce cla rius apparet, liceat ne, & piū an nefas sit, sacram scri pturam ex alia translatā lingua ad originalis lingue, unde traducta est, ueritatem reducere. Post hæc me moria repetenda sunt, quæ sancti doctores de pro fundo multipliciq; sacrarum scripturarū intellectu edixerint, quanta de uaria eiusdem dicti expositione non modo sentiunt, uerum etiam præ se ferunt, ex ponentes

ponentes eas multiplicibus variisq; sententiis. Hinc est quod sanctam scripturam profundissimo compa-
rant pelago, ex quo quantūlibet aquæ haurias, plus tamen semper est, quod superest. Idcirco eam adse-
runt plures diuersasq; expositiones suscipere, omnes tamen ueras. Hoc autem adeo pleriq; omnes adfir-
mant Ecclesiæ doctores, ut superuacaneum sit, ad id probandum testes adducere, præsertim breuitati stu-
dentibus. Postremo illud sciendum est, exemplaria
tribus modis de-
prauantur
Apposito
cum pro arbitrio nostro id supplere uolumus in scri-
pturis, quod imperfectum ac minus cōtinens existi-
mamus, sicut est in libro Regum, ubi cum tractatur
de secunda diffusionione Phylistinorum in ualle Rapha-
im infertur: Consuluit autem Dauid Dominum, &
in quibusdam mendosis codicibus additum reperi-
tur, Si ascendam ad Phylistiū, & dabis eos in manu
mea, quod in Hebræo fonte non reperiatur, iuxta eo-
rum sententiam, qui eam linguam apprime callent.
Sed quia in prima Phylistinorum diffusiōe legitur,
hic quoq; nonnulli censere debuerunt repetendum.
At in Genesi eo in loco, ubi dicitur: Nonne pro Ra-
chel seruiui tibi, quare imposuisti mihi? quidam su-
perfluo addunt Lyan. Commutatiōe uero, cum syl-
labarum aut partiu similitudine uel ambiguitate de-
cepti, nunc detrahendo aliquid, nunc addendo, in-
terdum aut mutando ad nostri arbitrii cōiecturam,

Sacra scri-
ptura pela-
go profun-
do similis.

Exempla-
ria tribus
modis de-
prauantur
Apposito

Commuta-
tio.

Subtractio

partes pro partibus uariamus, ut in Exodo. Cūctus autem populus uidebat uoces, pro uidebat plerique audiebat scribere, eo quod uox audiri potius soleat, quā uideri. Et in Genesi, Cum Ioseph duodecim esset annorum, pro decem & septem. Et in Lamentationibus Hieremię, pro uastatio & contritio, Vaticinatio & contritio. Et in Amos Propheta, tonsorem gregis, pro tonsura regis. Subtractione autem, quum de scriptura minuere aliquid pręsumimus, sine quo plenus nihilominus redditur intellectus, ut est illud in Ezechiele. Et dixit ad uirum, qui indutus erat lineis, & ait. Hoc quod ultimo ponitur, scilicet, & ait, si quis pręsumeret diminuire, intellectui nullatenus derogaret. Et in Zacharia: Ipse ædificabit templum Domino, & extruet templum Domino. Quod postremo ponitur, & extruet templum Domino, de multis exemplaribus detractum est. Quod si quis de his plura desyderat testimonia, & latius nosse hanc rem cupit, Nicolaum legat Tituli Damasi Diaconū, & bibliothecę suffraganeum, uirum quantum intelligere licet, Hebraicę linguę peritissimum, qui Lucii secundi Romani Pontificis tempore, ad Petrum Basilicę sancti Petri Canonicum scribens de sanctę scripturę emendatiōe, multa differtit. Nobis enim prolixitatem fugientibus, satis est uno uel duobus testimoniis, quod probare uolumus, astruere, lectorem impigrū ad eos, a quibus nos hæc sumpsimus remittētibz. Plura nanq; idē Nicolaus ait; Lustrās

armaria

Nicolaus
tituli S. Da
masi Dia
conus.

armaria, ne quibam hoc adipisci, ueracia scilicet exemplaria inuenire, quia & quæ a doctissimis uiris dicebantur correctæ, unoquoque in suo sensu abundante adeo discrepabāt, ut pene quot codices, tot exemplaria reperirem, usque adeo etiam millesimo fere post interpretationem Hieronymi anno, codices sacræ scripturæ mendosi atque corrupti erant, & ita inter se in plerisque discrepantes, ut quæ Hieronymus ad Damasium scripserat, eadem Nicolaus post tot annorum circula scribat ad Petrum, tot scilicet exemplaria esse, quot codices. Addit præterea se nonnulla cōperisse, de Hebræo abesse, quæ tamen in omnibus Latinis codicibus pariformiter reperiuntur. Quod enim in Genesi est, Dixit Cayn ad Abel fratrem suum, Egrediamur foras, quāuis in omnibus Latinis codicibus ita legatur, in Hebraicis tantum illud, Egrediamur foras, non esse scriptum, & eodem modo de cæteris quibusdā ait. Cuius rei causam, siue quod Hieronymus in aliis reperta translationibus, in sua etiam connexerit, siue ab alio, usu pristino præualēte, postmodum connexa sint, nescire se asserit. Additque hoc suum studii fuisse, quoad potuit, superflua refecare, transformata reformare, & ea rursus addere, quæ a præsumptoribus tanquam superflua fuerant amputata. Ita uir ille doctus, etiam longissimo post Hieronymi æditionem tempore, multa putauit, immo uero certo tenuit, uel apposita uel commutata, uel detracta, quemadmodū & ante Hieronymi tempora fuerant,

& ideo detrahenda, readdenda, emendanda & corrigenda esse. His igitur ita cognitīs, nūcad rem ipsam, de qua quæstio est, ueniamus. Cum sacrum Iohannis Euangelium Iohannes ipse Apostolus & Euangelista, spiritus sancti gratia plenus, Græco sermone scripserit, nulli dubium esse debet, quamlibet translationem originali literæ minime respondentem, non rectam esse, sed uitiatam atq; mendosam, opusq; esse ut is, qui ex una in aliam linguam aliquid transfert, eam ex qua fit translatio, in omnibus quantum fieri potest, sequatur, si se ueritatis interpretem esse atq; uideri cupit. Quod si quis in interpretis opere error animaduertitur, si qua dubitatio oritur, profecto eo recurrendum est, unde facta est translatio. Audi enim quid Beatus Hieronymus in præfatione super Mattheum scribat. Si ueritas, inquit, est querenda de pluribus, cur non ad Græcam originem recurrentes, ea quæ uel a uitiosis interpretibus male dicta, uel a præsumptoribus imperitis emendata peruersius, uel a librariis dormitantibus aut addita sunt, aut mutata corrigimus. Augustinus quoq; in secundo de Doctrina Christiana libro ita inquit: Latine quidem linguæ homines, quos nunc instruendos suscepimus, duabus aliis ad scripturarum diuinarum cognitionem opus habent, Hebræa scilicet & Græca, ut ad exemplaria præcedentia recurratur, si quam dubitationē attulerit Latinorum interpretum infinita uarietas, Rursus. Codicibus emendandis primitus uigilare debet solus

Hieronymus in præfatione in Mattheum.

Augustinus lib. ij. de Doctrina Christiana.

bet solertia eorum, qui scripturas diuinas nosse desyderant, ut emendatis, nō emendati cedant. Et iterū. Libros autem noui testamenti, si quid in Latinis uarietatibus titubat, Græcis cedere oportere non dubium est. Nonne his sanctissimorū doctorum uerbis instruimur, cum multa fuisse & esse uel interpretum uarietate, uel imperite emendantium uitio, uel dormitantium libroriorū incuria deprauata, tum ea corrigi licere atq; debere. Per illam quippe regulā, qua monemur in inquisitione ueritatis, atq; eius inuestigatione ad originalem linguam, & exemplaria præcedentia recurrendum esse, ac Latinorum librorum uarietatem Græcis cedere oportere. Videndū itaq; primo, quomodo se habeat in Græca atq; originali lingua, hæc, de qua quærimus, Euangelii auctoritas, & an sermo Latinus Græco consentiat, quod si dissentiat, an id facile potuerit dormitantium libroriorum uitio fieri, & an in aliis quoq; simile aliquid fieri potuerit, factūue sit absq; sancti doctoris, peritissimiq; interpretis Hieronymi culpa aut reprehensione. Deinde aliquot rationibus Græca litera comprobanda ac confirmanda est. Postremo rationes ab aduersario adductæ, soluendæ sunt. Apud Græcos ita manifestus est sensus Euāgelii, neq; aliqua uerborū ambiguitate inuolutus, aperte nanq; apud illos ita scribitur, τὰρ ἐν θρησκείᾳ μένεις ἵνα εἰρχῇ καὶ τὴν πόλιν; quod nisi ita interpretetur, ut dicat, Si eū uelim, uel si eum uolo manere donec ueniam, quid ad te? recte inter-

Coniunctio
ἐάν.

pretatū esse non potest, Græca enim illa coniunctio
ἐάν nihil aliud q̄ Si conditionalem coniunctionem,
causalemue significat, tantumq̄ interest inter ἐάν, id
est, Si, & οὕτως, hoc est, Sic, apud Græcos, quantum
fere inter duo contraria. Siquidem ἐάν ambiguam,
οὕτως uero certissimam rem significat, ut nullo modo
suspiciari quis possit, librarii uitio hoc apud Græcos
euenire potuisse. Nulla enim in una duarum dictio
num litera est, quæ sit in altera, nulla inter eas est pe
nitus similitudo, quippe ἐάν tribus literis componi
tur, quod Latine significat Si, οὕτως uero, quod Sic
a Latinis interpretatur, quinq̄ literas habet, tanta in
ter has duas dictiones apud Græcos differentia est.
Quomodo igitur se apud Græcos habeat hic, de quo
loquimur, Euangelii locus, & quomodo Latinus
sermo in hoc a Græco dissentiat, satis ex his quæ dixi
mus apparet. Quod autem in Latina lingua facile ta
lis error euenire potuerit, in promptu est intuenti,
quanta sit harum duarum dictionum Si & Sic simili
tudo atq̄ uicinitas. Vnica enim litera C. dormitan
tis librarii uitio addita, illud Si & Sic mutare potuit,
quemadmodū tonsuram regis in tonsorem gregis,
& uastationem in uaticinationem mutata fuisse non
nostra, sed antiquorum doctorum sententiā supra
demonstrauimus, manifesteq̄ ostendimus. Idē mul
tis quoq̄ aliis in locis factū extitisse probari potest.
Mox in ipso fere initio eiusdem Euangelii Iohānis,
ubi οὐκ ἐστιν θέλημα τοῦ σαρκὸς, nec ex uolūtate carnis, ait,
imperiti

imperiti quidam nec ex uoluptate carnis scribunt, N
in P cōmutantes, quod scilicet ad carnem pertineat
ipsa uoluptas. Et apud eundem post uerba Christi,
quibus affatus est matrem, & eam Iohanni, quem di
ligebat, commendauit, subiunguntur ipsius Aposto
li uerba, de se loquentis, ἡλαβεν ὁ μαθητὴς αὐτὴν ἰς τὰ ἴδια.
hoc est, accepit eam discipulus ille in sua, id est, in do
mum suam traduxit, communiter tamen Latini om
nes codices habent, accepit eam in suam, M litera ad
dita, quasi dicatur, in suam matrē, ob Christi scilicet
uerba, dicentis: Mulier ecce filius tuus, et ad discipu
lum: Ecce mater tua, quod euenire in Græco sermo
ne non potest, ubi nulla est dubitatio uel ambigu
itas, ἰς τὰ ἴδια enim, id est, in sua, nomen est gene
ris neutri, casus accusatiui, numeri pluralis, ἰς ἐαυτοῦ
uero, id est, in suam, pronomen est reciprocum, nu
meri singularis, casus genitiui, proinde nullus Græ
corum librariorum in ea parte fuisse credendus est er
ror. At de sua in suā facilis lapsus est, unica litera ad
iuncta. Manifestius autem hunc errorem probat, q̃
in quibusdam emendationibus Latinorum codicibus
nō in suam, sed in sua scriptū animaduertimus. Rur
sus apud Iohannē ita scribitur, ἔλαβεν αὐτὴν Ἐλισσὺς ἀπὸ
τοῦ Καϊάφα ἰς τὴν προτείριον, id est, adducit Iesum a Cai
pha in prætorium. Imperiti uero homines ad Cai
pham in prætorium scribunt, quo in loco apud Græ
cos quidem nulla errori occasio datur, cum ἀπὸ præ
positio, quæ in ab transfertur, & εἰς, quæ in ad, nul

lam prorsus inter se similitudinem habent, apud La-
 tinos uero facilis est in errorē lapsus, D littera A præ-
 positioni addita. Ita in prima Epistola ad Corinth.
 ubi Græci scribūt, *οἱ ᾧ πάντες ἐκ τοῦ ἑνὸς ἄρτου μετέχομεν*
 id est, omnes enim de uno pane participamus, Latini
 addunt, & de uno calice. Et apud Mattheum cap.
 xxv. *ἐξ ἑλθόντες ἐς ἀπόπτησιν τοῦ νομφίου*, id est, exiuerūt ob-
 uitiam sponso, Latini habēt, & sponsæ, quæ profecto
 augurari licet in marginibus olim librorū pro expo-
 sitionibus posita, ab ignaris deinde librariis oratio-
 ni intexta fuisse. Item in ij. ad Corinth. ubi Græci ha-
 bent, *ἐἰς πρόσωπον τῶν ἐκκλησιῶν*. i. in faciem Ecclesiarū,
 Latini scribūt, In faciē Ecclesiarū Dei, addentes De-
 Et in i. ad Timot. *ἐμπείησιν ἐς περισμῶν παίδων*. Id est
 incidūt in tentationē, & in laqueū, Latini addūt Dia-
 boli, quasi uolētes supplere qđ imperfectū & minus
 cōtinens uidebat. Multa huiusmodi, per omnes sa-
 crarum literarum libros addita, diligēs inuestigator
 inueniet, quæ nos breuitati studentes, in præsentia-
 rum obmisimus. Per subtractionem etiam, itemq;
 per commutationem eiusmodi errores posse fieri, la-
 tis, ni fallor, ostendimus, ne amplius in his nobis im-
 morandum foret, paucis multa comprehendere uo-
 lentibus, nisi quædam adhuc summa addere nos be-
 atissimi doctoris Augustini compelleret autoritas.

Augustin.

Hic in ij. de Doctr. Christ. libro ita inquit: Ex am-
 biguo linguæ præcedentis plæruncq; interpret falli-
 tur, cum non bene sententia nota est, & eam significa-
 tionem

tionem transfert, quæ a sensu scriptoris penitus aliena est, sicuti quidam codices habent, Acuti pedes eorum ad effundendum sanguinem, ^{αἰχμη} enim & acutū & uelocem apud Græcos significat, ille autem uidit sententiam, qui transtulit, Veloces pedes eorum ad effundendum sanguinem. Et alia quidem nō obscura, sed falsa sunt, quorum alia conditio est. Hinc est illud, quod quia Moschos Græce uitulus dicitur, quidam non intelligentes, plantationes uitulamina interpretati sunt, qui error tam multos codices præoccupauit, ut uix inueniatur aliter scriptum, sed de his satis. Nunc ad cōprobandam corroborandamq; literam Græcā, nostra uertatur oratio. Probauimus per sanctorū doctorū auctoritatem, & quidē satis, ut arbitror, Iohannē Euangelistā mortē obiisse, hoc ante omnia Latine literæ manifestissime contradicit, in qua dicitur, Sic eum uolo manere, nō enim ita uoluit, quando quidem nō ita fuit, nam si ita uoluisset ita profecto fuisset, aut igitur mentientis, aut pueriliter contententis uerba forent, ex illius ore prodeuntia, qui contraria iis, quæ loquebatur uolebat. Sed hæc de Saluatore cogitare nefarium est. Enimuero igitur quod nolebat, non dixisset, & quoniam eum nolebat in hac uita secundum eius aduentum expectare, non dixisset, Sic eum uolo manere, legendum esse. Quid quod sequens & pene continuata oratio hoc ipsum ostenditur, mox enim sanctissimus Euangelista Iohannes opinionem condiscipulorū, quam

Psal. xiiij.

ex Saluatoris sermone conceperant, dicentes discipu-
lum illum nō moriturum, his uerbis arguit, dicens :
Et non dixit Iesus, non moritur, sed si eum uolo ma-
nere donec ueniam. Quod perinde est, ac si eos erras-
se diceret, quod in eum sensum uerba Christi accepis-
sent. Quod si Sic eū uolo manere dixisset Christus,
quid ni uera discipulorū opinio fuisset? Nec Iohan-
nis uerba de falsa discipulorum opinione cōstarent,
sed sibi inuicem aduersarentur ac contradicerent, di-
xisse enim Christum, Sic eum uolo manere, & non
dixisse quod non moritur, aperta contradictione,
si uera de se Euangelista loquitur, qui & in cæteris
magis dilectus, & ut de seipso loquēs, apertius men-
tem uoluntatemq; Saluatoris intelligebat, profecto
Si eū manere uolo, non Sic eum uolo manere, legen-
dum est, & uero Euangelistę testimonio fides habenda,
qui mox asserit, se illum esse qui scribit, & uerum
testimonium de his perhibere, nō modo de Christi
actionibus hoc asseuerās, sed de omnibus a se in Euan-
gelio scriptis. Hoc ipsum Chrysostomiquoq; uerba
manifestis. cōprobāt, qui super his uerbis quasi uo-
ciferabundus, Mirare, inquit, Euangelistę humilita-
tem, quomodo aliorum de se non rectam opinionē
corrigit, qui non intellexerunt, quod de ipso Domi-
nus dixerat, sed putarunt eum nō moriturum. Præ-
terea cum e Græca lingua in Latinam translātū esse
hunc codicem, nulli sit dubium, constetq; apud Gre-
cos sine aliqua ambiguitate legi tā, hoc est, Si, profe-
cto na

Chrysosto-
mus,

Et non necesse est, ut & Latini quoque Si legant. Quæ enim
cū Græca ueritate consentiunt, Hieronymus inquit, illa
correcta sunt. Et Augustinus, ad exemplaria præcedentia
recurrendum ait, si quam dubitationē Latinorum
interpretum infinita uarietas attulerit, rursumque
libros noui testamenti, si quid in Latinis uarietati-
bus titubat, Græcis cedere oportere diiudicat, Ta-
ceo quod doctores Græci, Origenes, Chrysostomus,
Cyrillus, & cæteri omnes hunc locum eo modo ex-
ponunt, quo & se habere literā diximus, quibus pro-
fecto tanquam summis uiris, ac in propria lingua ap-
prime eruditis, & quæ in eadem lingua scripta sunt,
exponentibus potius, quàm quibusuis aliis credendum
esse negari non potest. Sed ne recentiores quidem do-
ctores Latinos hæc latuere, præsertimque Thomam
Aquinatem uirum ut sanctissimū, ita etiam doctissi-
mum. Hic in ea quam super Euangeliiis ex ueterum
doctorum dictis expositiōe composuit, Si scriptum
esse inquit, in Græco. Quod si in Græco Si scriptum
est, ut Thomas asserit, in translationibus uero non
uitiosis, teste Hieronymo, non modo uerba, sed etiā
ordo ipse uerborum seruandus est. Constat sane La-
tinos codices librariorū uitio deprauatos, non recte
se habere. Et hæc quidem ad probandam Græcæ lite-
ræ synceritatem, satis sit in præsentia dixisse. Ex qui-
bus aduersariorum quoque argumenta solui & refuta-
ri facile possunt. Nam quod principio doctorū La-
tinorum auctoritatē adducunt, & nos quidem Græ-

Quæ cum
Græca ue-
ritate con-
sentiant.

Doctis
sua lingua.

Thomas
Aquinæ.

Græcorū
doctorum
auctoritas

corum auctoritatē opponimus, quibus certe, cum
de his, quæ in eorum lingua scripta sunt loquantur,
& alioquin nec sanctitate uitæ, nec doctrina habeantur
inferiores, credendum potius esse fatendum est.
Adhæc dicimus non esse sufficiens ueritatis testimo-
nium, quod aliqui doctores ita eum locum exposue-
runt. Siquidem plæræq; alia in huiusmodi translati-
onibus inuenies, uel per libenarios corrupta, uel per
interpretes non recte translata, quæ tamen sancti do-
ctores, literam quam reppererūt, secuti, iuxta eandem
literam conati sunt exponere, & ita exposuerunt, ut
aliquando, quamuis literæ ueritatem non fuerint ad-
secuti, ueram tantum sententiam cum summa sapien-
tia exciperint, nonnunquam etiam si aliam ædide-
runt sententiā, q̄ authoris extiterit, ita tamen acutam
& grauem, & luculentam ædiderint, ut ipsa, & non
alia uideatur esse debere. Equidem fateor Augusti-
num uirum sublimis ingenii per Sic hunc locum ex-
posuisse, & quidem grauissimis acutissimisque rati-
onibus, hoc autem non satis esse ad persuadendum ita
debere scribi, ex eodem doctore manifestissime pro-
babo. Is enim locum illū Epistolæ primæ ad Timo-
theum exponens, ubi apud Græcos scribitur, *πιστός ὁ
λόγος, καὶ πάντως ἐπιδοχὴς ἀληθείας*, hoc est, fidelis sermo, &
omni acceptiōe dignus. Ita em̄ Hieronymus quoq;
hunc locum interpretatus est. Humanus, inquit, ser-
mo, quid ita? quia ita tunc scriptum repperat, & sic
per interpretem fuisse translatum, tantoq; acumine
& elegan

Augustini
in signis
lapius.

& elegantia ac gravitate sententiarum eum locum exponens illustrat atq; exornat uir ille sapientissimus atq; sanctissimus, ut nemo crederet aliter scribi debuisse, præsertim quid apud Græcos scribatur ignorās. Nulla quippe apud illos uocabuli huius ambiguitas. Siquidem *πιστός* fidelis sine dubitatione significat, quemadmodum & *πίστις* fides dicitur, nec aliqua est similitudo huius uerbi *πιστός* cum ea dictione Græca, quæ humanum significat, & tamen ita sæpe eo in loco replicat hoc uerbum Apostolus, ut uehementer admirer, quo pacto qui primus hoc in Latinum mutauit eloquium, num a Græcæ uocis significatione discesserit. Quid enim commune habet humanus cum fidelis? Hieronymus postea hoc, ut plæræq; alia correxit, & Græcam uocem repræsentans, fidelis sermo scripsit, non humanus, quo fit, ut nec Latino cui quā dubium esse debeat, errasse illum, qui pro fidelis humanus antea scripserit, contra Hieronymi, qui Græcæ linguæ peritissimus fuit, iudicium: Hunc tamen siue imperiti interpretis seu dormitantis errorem librarii, ita scite, grauter ac sapiēter exponit sum mum illud Augustini, acutissimūq; ingeniū, ut quē admodum supra diximus, difficile sit existimare, aliter dici debuisse, nisi quis ab authore dictum fuisse perspexerit. Quod ut facilius intelligatur, libet ipsa Augustini uerba, quæ in sermone de uerbis Apostoli scripsit, inferere. Audiuius, inquit, Beatum Paulum Apostolum, dicentem: Humanus sermo,

Ex Augu
stino.

& omni acceptione dignus, quia Christus Iesus uenit
in mundū, peccatores saluos facere, quorū primus
ego sum. Humanus ergo sermo, et omni acceptione
dignus. Quare humanus, et nō diuinus? Proculdu
bio nisi iste humanus sermo & diuinus esset, dignus
omni acceptione non esset. Sed sic est sermo iste hu
manus & diuinus, quomodo est ipse Christus & ho
mo & Deus. Si recte intelligimus sermonem istum
non solum humanum esse, uerum etiam diuinum.
Quare Apostolus humanum dicere maluit, q̄ diui
num? proculdubio enim qui non mentiretur, si di
ceret diuinum, non sine caussa maluit dicere huma
num, hoc ergo elegit, per quod Christus in mundū
uenit. Venit eīm per quod homo erat, non per quod
Deus erat. Semper hic erat. Vbi eīm non est Deus,
qui dixit: Cœlum & terram ego impleo. Christus
certe est sapientia & uirtus Dei, de qua dicitur: At
tingit a fine usq̄ ad finem fortiter, & disponit omnia
suauiter. Ergo in hoc mundo erat, & mundus per
ipsum factus est, & mundus eum non cognouit. Et
hicerat, & uenit: hic erat per diuinam maiestatem,
uenit per humanam infirmitatem, quia ergo uenit
per infirmitatem humanam, ideo prædicans aduen
tum eius, dixit humanus sermo. Nō liberaretur hu
manum genus, nisi sermo Dei dignaretur esse huma
nus. Nam & homo ille dicitur humanus, qui se exhi
bet homini, & maxime qui hospitio suscipit homi
nem. Si ergo humanus dicitur, qui in domo sua su
scipis

scipit hominem, q̄ humanus est, qui in se suscipit ho-
minem. Ergo humanus sermo, & omni acceptione
dignus. Vides ne ut locum hūc sanctissimus doctor
grauiter luculenterq̄ exponit, ubi tamen, Hierony-
mo teste, non recte humanus, sed fidelis dicendum
esse exploratum. Non est igitur sufficiens ueritatis
argumentū, ideo sic scribendum asserere, quia eum
locum Augustinus & nōnulli alii doctores ita expo-
suerunt. Hieronymum autem ita exponentem non
meminimus legisse. Patet hoc idem illius, quem su-
pra memorauimus, Nicolai Bibliothecę suffraganei
uerbis, qui post multa quę commemorauit, mendo-
se uel translata, uel per librarios scripta, addit postre-
mo, Quorum mendaciorum nonnulla etiam expo-
sita reperisse me memini. Ex quibus uerbis apparet,
potuisse aliqua a doctoribus exponi, qui linguam,
unde translata fuerant, ignorantes literam, quam re-
periebant necessario sequebantur, & nihilominus
esse mendosa. Ad hæc accedit, quod cum sacrę literę
sicut supra dictum est, tantę sint profunditatis, ut ua-
rios sensus, multasq̄ & diuersas suscipiant expositio-
nes, non est mirabile existimandū, si præter ueram
alicuius authoritatis sententiam, alia minus recta di-
uersis rationibus ita defendatur, ut recte uideatur ex
omni parte consistere. Etenim cum in ceteris discipli-
nis omnibus uoces tantummodo sint, quę res signi-
ficent, hoc proprium est ac peculiare scripturę sacrę,
quod nō modo in ea uoces res significant, sed etiam

Proprium
scripturę
sacrę.

res per huiusmodi uoces significatæ, res alias significant. Hinc est quod non modo iuxta literam, sed allegorice & moraliter, & anagogice sacram scripturam exponunt, ita ut quæuis eius particula ad aliquem istorum sensum reduci possit. At ubi historica seu literalis expositio prosequenda est, nisi uera sit litera, sensus quoque claudicet necesse est. Quod uero secundo loco asserunt, nihil prorsus in scriptura sacra innouandum esse, impiumque esse, ex ea imminuere aliquid, uel mutare, an ita sit, Hieronymus ipse respondeat, qui ut supra retulimus, non solum mutasse, sed emendasse se ac correxisse profitetur, quæ a præcedentibus interpretibus male dicta inuenit, uel a præsumptuosis emendata peruersius, uel a librariis dormitantibus addita uel commutata. Neque solum uetus, sed nouum etiam testamentum, ipsumque Euangelium tanquam antea corruptum emendasse se prædicat, ut posteriores etiam fecisse scriptura eandem iacturam post Hieronymum passa, supra demonstrauius. Si igitur non impium sed pium, imo uero piissimum fuit, Hieronymum talia emendare, addendo, subtrahendo, mutando, si posterioribus licuit, pro ut certe licuit, quauis ex causa ortos errores corrigere, ex quo tot doctorum uirorum libri fluxerunt, quibus correctorium biblicæ nomen est inditum, cur id nostræ ætatis hominibus non liceat? Audiant itaque primo Hieronymum, & cæteros qui eum secuti sunt, Ecclesiæ doctores impios dicere, & tunc nos quoque eiusdem

crimini

Correcto-
rium Bi-
blicæ.

criminis reos peragant. Sed hæc certe aut rudium
hominum uerba sunt, aut maleuolorum, maleq; di-
centium. Nūc ad illud quod tertio loco posuerunt,
argumentum responsuri. Si cōiunctionem ideo con-
ditionalem dici affirmamus, quod nunquā uera sit,
nisi conditione completa, & regulam hanc, quam tra-
dunt, ut nouam quidem temereq; inuentam, mini-
me ueram asserimus. Neq; enim indicatiuo siue præ-
senti, siue præterito iuncta, conditionalis semper ue-
ra est, sed aliquando etiam falsa, neq; cum subiuncti-
uo posita, falsa semper, sed aliquando uera, prout ex
rerum conditiōe falsitas, ueritas ue colligitur. Quod ^{Rerū con-}
ut manifestius intelligatur, quid Grammatici senti-^{ditio.}
ant, dicemus, deinde quædam ex Dialectica subiun-
gemus. Grammatici omnes tam greci quā Latini, &
in primis Priscianus, qui non modo sequitur Græ-^{Priscianus}
cos, sed id se facere, multis in locis gloriatur, Si con-^{Si con-}
iunctionem cōtinuatiuam esse aiunt, quando enim ^{iunctio.}
Græcum significat, eamq; sicut & reliquas continua-
tiuas, cum a Græcis ab Apollonio Herodiani patre, ^{Apollo-}
inter causales connumeratam esse, ordinemq; præce-^{nus.}
dentis rei ad sequentem significare, cum aliqua dubi-
tatione essentia rerū, uel ut Græci dicunt, sine signi-
ficatione essentia, ut, Si stertit, dormit: & si ægrotat,
pallet: & si Febri uexatur, calet, neq; enim conuerso
ordine in his cōsequentiam sententia seruatur oratio.
Non enim qui dormit, omnino stertit, & sic de cæte

ris, non irrationabiliter eas causales esse aiūt. Et continuationis enim & subcontinuationis, quemadmodum & adiunctionis & effectiōis, per has causā ostenditur reddi. Continuationis, ut, Si ambulat, mouetur. Causā enim cur mouetur, ipsa est ambulationio. Huiusmodi causales interdum pro approbatiuis poni cōmemorant, quoniam scilicet, & id quod dicimus, ita certum apertumq; est, ut impossibile sit, aliter opinari, tuncq; duntaxat indicatiuo coniungi, ut apud Virgilium, Si quid usquam iusticiæ est, & alibi, Dii si qua cœlo est pietas. Indubitatum enim & in cœlo pietatē esse, & in mundo iusticiæ aliquid: Hinc in facilem errorem inciderunt aduersarii mei, putantes quoniam Si causalis pro approbatiua posita cum indicatiuo coniungitur. Ideo & econuerso, quoties cum indicatiuo coniungitur, esse approbatiuam, quod longe est a ueritate, non enim quoties indicatiuo coniungitur, esse approbatiua potest. Quāuis quoties approbatiua est, indicatiuo iungitur. Infinita huius rei exempla sunt, sed nobis hæc modo sufficiant. Si male locutus sum, inquit Dominus apud Iohannem, testimonium perhibe de malo, si autem bene, quid me cædis? Si quis hoc loco asserat ideo approbatiuam esse Si coniunctionem, quoniam præsentī indicatiuo iungitur, certe & male locutum Dominum asserat necesse est. Quod si male locutus est Dominus (quod nefarium est sentire) cur mox

cur mox addit, Si autem bene: Et cum de se diceret
Saluator, Si ego in Beelzebub eiicio dæmonia, quod
in Beelzebub eū eiicere dæmonia fateatur oportet.
Qui Si indicatiuo iunctam, approbatiuam uult esse
oportere, uerum non nobis, sed hæc nos dicere co-
gentibus, huiusmodi blasphemias imputari uolu-
mus. Similiter apud Virgilium dicitur,

Si datur Italiam sociis & rege recepto

Tendere, ut Italiam læti, Latiumq; petamus.

Sin absumpta salus, & te pater optime Teucrum

Pontus habet Lybiæ, & reliqua.

Vbi quanquam indicatiuo Si præpositio iungatur,
non tamen approbatiua est, sed causalis, siue condi-
tionalis, neq; enim significat rem certam, unde mox
additur, Sin absumpta salus. Sed hæc de præceptis
Grammaticis suppressisse satis sit, nunc autem de Di
alecticæ referamus. Licet Si coniunctionem condi-
tionalem esse, etiam Dialectici fateantur, conditiona-
lem tantum ex ui locutionis nihil prorsus affirmare,
nullamq; suarum partium asserere tradunt, sed tan-
tum inferre consequens antecedente confesso. Nulla
etenim propositionis pars, siue indicatiuo, siue sub-
iunctiuo Si conditionalis coniunctio adiungatur, ab-
solute seu categorice ponitur, sed solum consequens
propositionem infert, posito tamen antecedente
conditionaliter, & non alias, ideo nullius partis ueri-
tas ex totius ueritate potest inferri, Quis enim sanæ

Ex Diale
cticis.

mentis ausit dicere, quoniam ueræ sunt huiusmodi
propositiones, Si sol est supra terram, dies est: &, Si
homo currit, animal currit, idcirco & antecedentia,
uera esse, scilicet quod sol sit supra terram, & homo
currat. Itaq; inter illas propositiones, in quibus Si in-
dicatiuo adiungitur, & eas, in quibus adiungitur sub
iunctiuo, non hoc interest, quod illæ quidem certitu-
dinem, hæ uero ambiguitatem habeant, sed quod
illarum principales partes seorsum acceptæ, atq; per
fectum, & affirmant negant ue aliquid, instar propo-
sitionum categoricarū, quæ uerum falsum ue signi-
ficant. Etenim ab hac propositione, Si Socrates feбри
uexatur, ablata Si coniunctione, reliqua pars, quæ
est Socrates feбри uexatur, categorica efficitur propo-
sitiō, & uerum falsum ue significat. Illarum uero par-
tibus hoc minime contingit. Nam si ab hac propo-
sitione, Si Socrates curret, Si coniunctionem abstule-
ris, reliqua pars, quæ est Socrates curret, nec categor-
ica propositio est, nec aliquid affirmat negatue, sed
ut falsum uel uerum significet, sensumq; perficiet ex
aliis dependet partibus. Ex his ergo manifesta ad ter-
tium argumentum aduersariorum est responsio. Si
quidem hæc propositio, Si eum uolo manere donec
ueniam, non ideo certum significat, quia indicatiuo
coniungitur propter eas, quas diximus, rationes.
Falsa est igitur aduersariorum conclusio, quod scili-
cet particula illa significet, ac si diceretur, Sic eum uo-
lo ma

lo manere, quippe fallacia cōsequentis est. Nec em̄,
ut supra dictum est, cōuertitur, neq; uere possumus
dicere, quoniam cum approbatiua est, si indicatiuo
coniungitur, approbatiuam esse. Sed ut iam quartū
aduersariorū argumentum aggrediamur, dicimus
minorē falsam esse. Etenim satis a nobis supra osten-
sum est, continuatam adhuc uitam Iohannis Bapti-
stæ dubii quidem habere plurimū, certi uero nihil,
mortem uero eius plus certi habere, q̄ dubii. Aduer-
sarii uero in hoc præcipue fundant argumentum, q̄
nulla sit de Iohannis morte dubitatio. Quod uero
ad confirmationem opinionis suæ, exemplum addu-
cunt die Veneris carnes edentis. Quid aliud dicen-
dum est, q̄ quod paulo ante retulimus, ueritatē uel
falsitatem rei huiusmodi propositionem uel certam
facere, uel ambiguam. Enim uero qui tali die carni-
bus uescitur, si uerum fateri uelit, & increpanti ita re-
sponderit, Si comedo quid ad te? Comedere se actu
affirmat, quid si idem dicatur non comedenti? Non
ne & ille ita respōdebit, Si comedo quid ad te? Non
quidē ut uesci se carnibus fateatur, sed ut falso argu-
entem irrideat, & iniustum accusatorem irriter atq;
contemnat. Quid si eo die comedens carnes, ab accu-
satore suo prouocatus, ita respōdeat, Si comedo uel
non comedo, quid ad te? Recta certe locutio erit, an
ideo dicemus, quoniam conditionalis indicatiuo
coniungitur, approbatiuam esse, uerumq; esset, q̄

ille carnes edat, & non edat, id uero ne infani quidem faterentur. An uero dicemus unam quidem partem ueram esse, alterā falsam? Falsum igitur erit, quoties Si indicatiuo coniungitur, esse approbatiuam. Quod uero aduersarii uelut tacitæ obiectioni respondentes, non uim uerborum & sensum intellexisse Dominū, sed negare Euangelistam, aiūt, illum huiusmodi uerba protulisse, inepta sane & puerilis Euangelistæ sententia foret, si sciens Dominum uelle se in hac uita manere donec ueniret, condiscipulos ueluti falsa opinantes redargueret, idq; duntaxat prolatione uerborum, in quo illi quidem mirifice forent laudandi, nimio acumine ingenii ex ambiguo sermone ueram elicientes sententiā. Quos contra Chrysostomus falsæ de se opiniōis refert ab Euangelista fuisse correptos, quod cæteri quoq; qui eum uita functum putant, proculdubio dicerent: Dicere præterea per ea uerba, Sic eum uolo manere, uoluisse Christum ita manere Iohannem, sed Petrum redarguere, minime ad se pertinentia quærentem, puerili potius contentioni, uel argutuli Sophistæ fallaciis, quàm Domini nostri Iesu Christi grauitati & sapientiæ conuenit. Sed esto sane ut dicitur, nonne hoc superioribus dictis repugnat? Etenim si uerba duntaxat Euangelista negat, ut dictum est, sensum igitur concedit, dixit ergo eum Christus non moriturum

turum, quod si ita est, quomodo hæc duo constabunt? quod & cum non moriturum dixerit Christus, & quod non ideo dixerit, quod ita uellet, sed ut Petrum redargueret arcana quærentem. Demum, quis non uideat quartum aduersariorum argumentum huic solutioni contrarium esse? Siquidem illic dicunt proculdubio Iohannem adhuc se manere; hic uero, non ideo sic dixisse Dominum, quod ita uellet, sed ut Petrum increparet. Nam quod postremo addunt, moriendum potius esse, quàm quicquam de sacra scriptura cōmutandum, neque posse esse catholicum, qui hunc Euangelii locum commutare præsumpserit, adduntque eum, qui hoc ausus fuerit, etiam peiora facturum, si ei autoritas & uires accesserint, & si talia sint, quæ nos ad risum potius moueant, quàm ad respondendi laborem suscipiendum, tamen ne hanc quoque partem intactam præteriiisse uideamur, Hieronymum, Augustinum, cæterosque & ueteres & nouos doctores opponimus, qui cum nō modo Catholici, uerumetiam sanctissimi fuerint atque habeantur, multa tamen & in ueteri ex Hebræo, & in nouo testamento ex Græco fonte edocti, mutare, demere, addere, corrigere, emendare, resecare, reformare, & ut eorum uerbis utar, readdere non erubuerunt, quemadmodum in superioribus satis superque a nobis ostensum putamus. Verum ut ali-

quando dicendi finem faciamus, dissolutis iam atq;
rescissis aduersariorum argumentis, dicimus, inge-
nueq; testamur, licere cuiuis, tum ueritate rei, tum
Græcæ atq; originalis linguæ concordia freto, absq;
ullo metu, aliquo ue iniustæ calumniæ periculo cum
sancto Euangelista, Græcisq; doctoribus, Si eum uo-
lo manere donec ueniam, legere atq; proferre, mulie-
bribus minis et uanorum hominum iurgiis contem-
ptis, ac pro nihilo habitis. Libet autem in calce ora-
tionis quasi signum, ut aiunt, imprimere sermoni,
& ueluti in asylum contra omnes oppugnantes nos,
recipere. Eia igitur eat, progrediaturq; in medium
egregius sacrarum literarū interpretes, integerrimus
uir Hieronymus, & quasi ueritatis ac iusticiæ pro-
pugnator, quomodo ipse hunc locum transfulerit,
ostendat. Hic in ea, quam ad Iouinianum de uirgini-
tate scripsit, elegantissima oratione, Rursum, inquit,
de Petro loquens, post auditam sententiam, quod
ab alio cingendus esset, & ducendus quo noller, &
crucis illi fuisset passio prophetata, & ille diceret:
Domine quid iste? nolens Iohannē deferere, cū quo
fuerat semper copulatus, dicit ei Dominus: Quid
ad te, si eum uolo sic esse? Quis amplius alios testes
citat? Quis aliud desyderat testimonium? cum Hie-
ronymum ita audiamus dicentem, Si eum uolo sic
manere? Quid enim aliud est sic esse, nisi manere?
Nam ita

Nam ita dicere, Sic eum uolo, sic esse, nemo auderet,
nisi barbarus. Manifestum est igitur, & antiquiores
Hieronymo interpretes, qui Sic pro Si scripserunt,
nisi librariorum menda fuerit errasse, cum Hierony-
mus ipse, Si uolo, dixerit, & eos qui Hieronymum
sunt secuti, pristino usu corrupti sermonis præua-
lente, uel imperitorum præsumptione, uel incuria li-
brariorum, pro Si Hieronymiano, Sic illud pristi-
num continuatis temporibus conscripsisse. Sed nos
quidem cum Hieronymo, cum synceritate Græcæ
scripturæ, cum Græcis doctoribus, ut fas est, sentien-
tes, Si eum uolo manere, legamus, ad gloriam eius,
qui per sacratissimum Euangelistæ Iohannis
os Græco sermone scribentis, hæc lo-
quens absq[ue] ulla prorsus ambigui-
tate uerborum, Si eum, in-
quit, uolo manere do-
nec ueniam, quid
ad te? Tu
sequere
me.

F I N I S.

HAGANOAE APVD IOHAN

nem Secerium excudebatur, Anno à Christo

nato M. D. XXXII.

Mense uero Febuario.



BIBLIOTECA NAZ.
ROMA
VITTORIO EMANUELE